

呈文
帖
詩

谿谷集
十一



谿谷先生集卷之二十四

呈文二首

毛都督前呈文 丁卯

朝鮮國黃海道觀察使張紳謹呈為催運米糧接濟軍需事天啓七年某月 日准欽差云云毛令牌前事照得云云遲延未便等因得此竊照卑職受任在西路創殘之後四月某日始到治所兵燹之餘庶事蒼黃貴鎮送貨貿糧係是前任時事卑職都未省問及准令牌乃始查訪顛末檢校文簿然後稍得頭緒蓋上年貴鎮貨價准折糧米該數

三千八百五十包零內一百包則曾蒙蠲免已有
票文又一千二百十七包九斗三升已經輸納受
票此外九百十四包十斗曾將原貨分俵民間未
及收取因遭兵禍其受貨民人等或被虜或殺死
殆盡無處討尋唯一千六百十八包二斗三升上
年秋冬間已收得載船會值風高凍阻未及打發
今春猝遇虜難大兵屯駐平山游騎分搶沿海窮
僻浦港無處不到守船人役各自逃竄糧船所載
被賊搶又餘存者甚尠賊退後又緣饑民望哺旋
即俵給今無一包見在者然此既經裝載理當償

納當待秋禾登場令民准償方可陸續發運第觀
弊道人民被賊殺擄者通六三萬餘口了遺殘氓
耕種失時夏秋夾又遭司水之灾高下田禾一掇
失稔西成絕望恐秋後收斂未易以老爺明鑑想
能洞悉也仍念老爺駐師弊境以滅醜虜衛屬國
為己任弊邦君臣倚若長城凡有助濟軍需固當
唯力是視况此貨物所冀豈敢言所靳固顧今弊
道酷經兵火墟莽越日六六亦之雖欲竭力仰副
實同搾汁枯木此思曠所以焦心煎迫不知所出
者也伏願督府老爺曲無矜恕其被兵死亡無處

尋討者特賜蠲免其已經載船今該償納者亦宜
寬其催督減數責償則劍餘黔首舉皆鼓舞洪賜
矣又准令票一道青布四十筒收買鹽斤得此畢
職即分送沿海各官使依價買取第兵後各處鹽
戶死亡幾盡存者僅什之二三莫造既窄鹽價頓
踊恐所買不多無以佈撫軍前需用亦望老翁恕
諒勿加咎責為此合行具呈請照驗施行須至呈
者

袁軍門前使臣呈文

謹呈為仰陳海汴事情冀蒙採納事竊照已伏法

總鎮毛曾因奴難軍舸東渡襲取鎮江頗有所獲
遼民之困於虐焰者聞風並集歲月之內亡慮數
萬以上毛遂張其功伐驟蒙 恩賞官崇一品
寵及先代毛若感戴 皇恩策勵忠力團束所集
民兵進據近遼形便之地牽掣奴勢可戰可守則
虜必狼顧脅息不敢肆意妄動非唯有功於天下
在小邦亦荷帡幪之庇矣奈毛本無遠志遽懷驕
恃擁其兵衆入住皮島島在本國西洋中去遼岸
絕遠而毛占為巢窟以為自衛之計虛冒戰功上
瞞 朝廷乾沒餉銀自肥囊橐而又不能戢下多

縱軍民散布平安黃海等道無處不到奪攘財畜
劫辱婦女種種侵虐言不能盡小邦官吏為是
天朝之人不敢相較坐受橫暴罄竭儲積以供需
索事力垂盡不敢告病逮夫丁卯之難小邦酷被
奴賊搶犯兇鋒克介迫近王京而毛不曾遣一兵
發一鏃以闕奴兵後塵唯縱亂兵搜覓山谷逸亂
之民或戕殺奪貨或斷頭冒級乃反橫做蜚語謗
毀小邦只緣外藩體面不敢据實訟辨泯默含冤
無處告愬亦念皇朝必有明知彼之罪惡而難
於處斷姑相為假借焉耳茲者某官老爺奮發英

略然運神機不動聲色致行 王法威聲所及遠
邇震竦此正恢張風采振肅綱紀滅醜虜蘇弊藩
之大機會也夫毛之所為其貽害於小邦者固小
邦之所自知若其欺大罔 上方命橫恣之狀必
有小邦之所未盡知者也竊念自今以往凡海上
局面弛張闔闢都在老爺手中必能深思熟計一
反徃轍使逆奴寒膽屬國蘇息此海外蒼生引領
而望拭目而覩者也職等航海萬里奉表 天門
經由貴治獲瞻威容竊不勝區區欣聳鼓舞之情
粗陳瞽說仰備採擇干冒威嚴伏增惶悚為此合

行具呈伏請照詳施行須至呈者

帖 四十七首

孟推官回帖

天禍敝邦舊王不克靈承 皇命曩倫之數極矣
乃者國人同奮請命于 母妃不毅以臣民不釋
之故權攝國事深懼薄劣無以嘉靖藩服茲蒙專
命慰藉敬佩寵靈欣感何已大人所齋 皇勅非
天子所以命不毅者不毅未敢祗承想大人有以
諒之奉展有期姑報崖略

孟推官回帖

辱托開示懇篤所以為不穀謀者至矣不穀敢不
欽佩第敝邦事情實有迫蹙不容無言者敢為高
明傾倒焉夫懋遷有無彼此相資此古今之通義
小邦使价之聘上國例蒙開市之利既上國之
所無慳於敝邦者而敝邦何敢為王人靳固但
敝邦民俗訾窳偷生市廛販賣只是服食器用之
需異物珍貨都非所急頃屬廢君亂德所以事
上國者以文不以誠以物不以禮凡差來員役請
有貿易輒以市道應之誠如來示所云加以奸臣
之所措克虐政之所誅求民力竭矣四民失業萬

室懸磬言之足以於邑幸今事異往日不穀唯願
竭誠殫氣繕甲索賦以與天朝協力共滅逆虜
若以垂盡之疲氓又責之以其所不欲則不唯不
穀將無以為國抑非所以仰承皇朝德意也不
然設官平直彼我交利有何不便而故屢拒盛意
若此哉昔韓宣子欲從鄭賈市玉環子產不可宣
子從之君子交以為美不穀區區敢僭擬國僑
唯願大人匹休韓子耳徑率至此惶汗沾背亦恃
高明恕亮焉尔

毛都督帖

日者屢蒙損翰殷勤甚備第揄揚過實不穀何以
當此慙慙增愧逆胡尚逋天誅遼左山河腥膻未
洗普天之下實同憤恥况我東藩世沐 帝澤情
均父子者或不穀自在側微每念 聖皇宵旰之
勤暨征遼將士暴露之苦心膽懣律寢食不寧粵
自攝事以來便欲秣馬礪兵躬巡西徼臣與大人
議會遇之禮論征勦之略顧以國內甫定庶事草
創方勤綏戢未遑遠駕然其一念憧憧長在督府
旌麾之間茲承眷誥開示事宜其為敵邦長恩者
可謂至矣不穀敢不奉以周旋以無墜大人懇篤

之意怠貺諸品已愧過腆至於截肪寶帶比德歎
然何物以報薄小伴減聊伸微悃統希鑒在不宣

又

自幕府廻駐洲中節序荏苒已過天中而敵邦廢
事草創不得以時奉咫尺之書內顧不敏恒用慙
慙醜虜久無聲息狼心難測制勝機宜想應已有
成筭夏序漸熱惟願為天下益加保裔謹此專价
伸候不腆土物聊表微忱

又

高秋屆候物色慘慄緬憶海嶠暴露之苦西望神

馳陪臣適到惠翰辭意激昂真有劉越石祖士雅
之風欽嘆欽嘆 聖天子恩勅宜有使者來宣
設令小邦微有館候之費禮所當然遑恤其他乃
蒙大人曲念小邦凋弊抑友于之情輟錦衣之行
自非深仁體物視人猶已何以及此推是道也尚
安有憑藉同利以干三尺者哉大人此舉豈唯敝
邦嘉賴之將風裁從耳傳憲區矣至如硝磺之轉請
買糧之緩期無非高誼盛心不殺將何以仰報只
有銘佩而已肅此伸謝統希盛諒

登州軍門謝帖

自遼左路梗敵邦陪臣引誘上國者皆取道渤海未濟有舟楫之危既濟有道路之艱艱苦至矣幸賴大人開府東表凡使臣之往返之州悉蒙接濟恩禮勤篤至於留泊船人亦霑餉給迴程護送特煩差人使一行負役竣事利涉此無非皇上字小柔遠之深仁而大人之高誼盛眷亦可謂無所不用其極矣敵邦君臣感愧銘佩不知所報今因使臣之行肅此附謝不腆上宜敢將微悃

毛都督回帖

陪臣傳致惠帖開示機密憂深慮切苟非大人至

情相念何以及此私心銘感不知所謝帖中云云
未委的指何人似是為邊臣而發不穀自莅事以
來凡臯日無良不恪之徒悉伏三尺受委邊垣者
舉是忠盡可託心膂渠皆拮据諸侍以供貴鎮繕
治兵甲以備勁寇其嘗膽枕戈浙夕勵志者無非
為敵懷殲虜耳寧有反側不軌如來示所云乎此
必遼鮮樂禍之徒自挾私憾扇鼓妖言欲售傾陷
之計不然或是逆虜狡譎多縱反間欲去其所慕
如陳平之間范增韋孝寬之害斛律耳願大人以
雅量鎮之無為流言所動而有此過慮也目今江

冰腹堅壇亭方亟一二邊吏嚴警不懈戒慎鑿鑰
 非唯自固壇園實為貴鎮扞蔽計尔介冑粗入未
 閑禮節雖有微失亦宜容而教之以收鳴吠之效
 此不穀所望於大人也頃日咨稟本擬為貴鎮畫
 長策以為客主兩便之圖辭語未終觸冒忌諱慚
 悚之至殆欲咋舌至於譯胥所傳只道大人略相
 嗔怪而已絕無溢惡之語不穀區已付之過耳風
 聲矣不穀與大人周旋數載肝膽相照唇齒相依
 唯思協心勦虜共報皇恩皎然此心神明可質
 若以頰舌詭訛致芥蒂其何以覲然人面哉殘

臘向盡唯倍加珍衛衷慄難罄臨楮耿耿

毛都督帖

自狂虜搆難豕突難遏不穀既越在江都大人亦
屏處海島緣壘事方殷道路阻絕不得奉尺書之
問西望馳情曷有其極敝邦兵力殫竭猝遇強寇
顛沛至此尚何言哉頃接來咨足見勝筭有定無
忘唇齒之義以救焚溺之急是區區日夕延望者
也薄物件楨聊伸遠悃詳具回咨不多及

毛都督帖

日者差官傳寄咨帖輒具復付伴臣以送爾時賊

鋒方克斥遠近水陸取道皆不易未知其果能仰
徹清覽否狂虜豕突勢若滔天不得不用計羈縻
之姑紓目前之急賊遂大掠而西雞犬無遺今鮮
少退畢竟狡計難測恐無以善其後也大人久處
島中想儲備垂罄顧敵邦亦罹播遷調兵轉餉八
路騷然而平安黃海兩道酷被兇燹公私之蓄蕩
然如洗雖欲略相周濟力不能逮愛莫助之茲差
從臣憑木道徃候起居仍令有司拮据得一百包
殘米略資一日之費一切慚嘆時事亟矣唯各相
努力臨風傾僚不任區區不腆土物聊用表忱統

希鑑在

蔣守備回帖

足下間關冒險來此孤島播遷之中庶事草創客
主情禮多覺欠缺愧慙慙來文辭意勤懇洞悉
敵邦情事至其備虜方略舉合機宜苟非足下至
心相與何以及此敵邦兵力本來單弱只守區區
忠義為醜虜所仇疾猝遇兵禍顛沛至此所幸足
下來在敵邦目擊被兵之狀一言足以破衆惑唯
願西還之日備將此間事狀徼聞于朝堂諸位
俾蒙憐憫拯濟之恩不勝萬幸

毛都督回帖

辱帖開示委曲苟非骨肉雅誼何以得聞此語深
自銘感方不穀播遷江華而賊逼平山也所望纓
冠相救者唯有貴鎮而聲援未能相及爾時果不
無介然於懷者久之頗聞大人時出偏師牽掣賊
勢而龍骨等處義民屢蒙資助糧仗乃始釋然知
大人高義雄略果如是也兵家制變不一其道頃
日所以權許虜平者是豈真心實着要為羈縻緩
師計耳第敝邦服事 皇朝惟有一念忠實是其
本領業已有是計而行是事則無論經權是非不

容不備盡陳聞此正藩邦事 上無隱之道謂與
忠順刺謬殆不然矣今承來示意極周悉其為敵
邦慮至矣貴鎮既為敵邦惓惓若是即有可以為
貴鎮地者敵邦何所不力焉當就原疏及來稿通
加點化期於穩妥耳餘賊尚未捲轂壇事無時可
已平黃二路酷經塗炭糧餉器械蕩然如洗波及
之潤非貴鎮將何望焉唯冀益恢勝筭共成勦虜
之績縷縷不悉

毛都督謝帖

自虜騎長驅勢同豕突鴨江以東無能遏其鋒銳

而鄭鳳壽糾集民兵激厲忠義嬰孤城抗勁賊屢
立奇功此外如小義浦將領李立及宣鈇等處義
民憑依巖阻屢却賊兵自是邊民稍知城可守賊
可擊漸有奮勇殺賊之心古人所謂一夫善射百
夫決拾者於斯徵矣不穀既將鄭鳳壽李立等超
官增秩以酬其功其力戰將士悉加賞賚唯是賊
兵出沒宣定之間餽路阻絕孤城糧盡有食人炊
骨之憂幸賴貴鎮屢送米糧多至累百石仍助器
仗急困濟難之義可謂至矣不穀曷勝啣感龍骨
送糧只憑木道近聞漢人之下海搶殺者日以益

甚糧船往往被掠無緣得達龍川亦願另發差人
申嚴禁令使海道無梗幸甚薄物侑掖統希鑑領

毛都督帖

古官西去憑致覆帖想今已闕崇照奏疏謹將來
稿察互更定差人賫往和事本非實著祇是將計
就計緩禍於目前而伸志於日後耳然若全沒其
事便非藩邦事 上無隱之道有罪無罪天鑑孔
昭何敢有一毫遮飾自負宿心耶喇嘛僧一款曾
聞有是事久矣而奴書中不道者今若攬入恐涉
粧撰只得於下文及之高明想能諒悉也貴鎮水

陸勲伐及資濟邊臣等事敵邦銘佩有素不敢掩
羨暑甚為天下加護不宣

毛都督回外

邊臣傳致惠翰知舟師進薄灣上想已漸收勝筭
為之神往李立管下兵民處勢孤危蒙貴鎮屢垂
護念濟以資糧得至今日此惠何可量也但渠之
拚死駐此本擬扼守受害與龍骨掎角以遏虜衝
耳倘力窮勢屈須至移避亦宜不離邊上陸地今
若遠入海島恐與初志乖刺渠亦自顧法度安肯
擅離信地事理如此想大人自能體諒也道梗傳

信不易詎堪馳遡忽忽不既

毛都督帖

伏熱方酷挾以霖溽緬惟督師臨戎福履神相日
者賊寇平山也不穀遣宗親原昌令以赴軍前議
事被伊賊擁之西去到瀋陽胡酋旋即送還仍差
劉興祚帶數十騎護行前來敝京又己未被擄將
領姜弘立等在胡中有前後被俘若干男婦與之
同住今因原昌之行而有出來者伊賊此着殆欲
試我深淺狡譎叵測顧敝邦新經毒害不欲橫拖
釁怒姑外示好意以待之緣大人出師下海今始

相報想能諒悉餘冀為天下益加比重不宣

毛都督回帖

辱札開示縷縷無非肝鬲之要三復慨然自古疆
場立功之臣往往不免萋菲不穀每覽前史為之
搯擊以大人之忠勞勲伐猶復遘此信乎古今同
一恨也然 聖天子明見萬里中山盈篋之謗自
當潛消於 天鑑中無煩屑屑辨白矧出位之言
外藩何敢僭易發口耶不穀遭罹厄會師劔國創
危困至矣顧薪膽一念食息未嘗忘即今灣賊雖
退兇情終是叵測素土綢繆豈敢少緩所示備禦

方略言言真切不穀謹銘佩周旋陪臣西去肅此
附謝秋序且盡惟倍加必重薄物將忱并希鑑照
不宣

毛都督帖

不穀比聞大人每以邊臣向日事意不釋然屢形
於色辭不穀始聞之瞿然錯愕既而稍自解曰夫
疑畜於心誠難祛也及發於言則可得以解今大
人既以是見語不穀何敢自外於知己不自盡其
衷裡乎壇場煩言自古有之向來邊臣所疑果是
無理古人稱流言止於智者智有未至則宜其不

能無惑也邊臣識慮淺短猝有所聞未免驚惑誠
為有罪若曰不穀亦有疑焉萬萬無此邊臣之妄
作者不穀輒即拿究大人亦必聞之矣不穀與大
人周旋數載情猶骨肉勢同唇齒况封典之降
多藉大人費力敝邦百世所銘感也恨事力未
逮不能報塞盛意尔豈以一時噂沓傷金石之交
誼乎今雖迫於強虜姑講羈縻之策然衷曲所存
可質神明兵家美略不容有經無權此高明所宜
恕悉也禁虜鷓鴣張日甚邊圉之憂方殷而未已正
如同舟遇風波協心一力共濟艱危之不暇倘或

爭恨細故睚眦不已終歸於誤大計而為天下笑
豈非大可恥者乎不穀雖甚昧昧亦聞長者之風
矣宵中不容留一點芥蒂敢盡布之執事願執事
實圖利之

毛都督帖

新天子光臨寶位當有慶詔之頌未知詔使
是何人何時辭朝何時到登州何時當乘船開
洋也願無惜細示向時詔使之行例於鈇山海
岸卸船登陸敕邦自中兵以來邊止守備盡隳安
州以北人烟斷絕虜騎出沒無常無論供頓之具

計無所出萬一伊賊偵伺 皇華到境潛師偷渡
行掩襲之計則事有不可言者此非但敵邦憂亦
大人所宜深念也倘風帆取路直泊於安州迤南
地面則去邊塞稍遠可防不虞之患兼以餽牽委
積稍可拮据敵邦庶得免於罪戾矣大人鎮撫海
上幹旋之機都在身上凡可以為敵邦地而得
皇華之歡意者宜無所不用其極此區區之所望
也不穀之於大人事均一家休戚是同茲敢不避
煩屑悚仄悚仄

毛都督回帖

邊臣傳致二道辱帖辭意勤懇無非直寫衷悃繙
復再三感着倍常敝邦服事 皇朝恩同父子凡
中朝官寮均有兄弟之義况大人駐師敝境周旋
數載休戚與共其情之篤而義之殷何啻骨肉至
於請完 封典曲荷厚義夫有德於人大人或自
忘之受德於人不穀何敢忘也向者堙場之間雖
有流言不穀未嘗略懷纖芥且如大人往往因傳
訛之言或至徹聞 朝廷此亦豈實有疑於敝邦
而然哉彼此往迹真如太空浮雲不足更存於靈
臺唯思各敦舊義以期共報 皇恩此今日所當

勉也日者已遣重臣委候幕府洞陳此間心事想
今已徹崇聽也黠虜兇狡禍心難測不穀方自勵
薪膽謹飭邊閫益修陰雨之備奈創兵已酷糧械
儲胥萬分踈虞所藉唇齒之援非貴鎮將何望焉
陪臣之迴想必有嘉誨唯切企望薄物非敢為報
并希納鑒不宣

又

帳中所示欠貨留畜及流徙遼民等事詳具來咨
不穀已悉示意大人駐師敝境已近十稔兵民資
用懋遷相通寄置掛欠理宜有之有負必償天下

之通理况此係是軍需尤不可忽者乎以弟念平安
黃海二路醢被兵禍沮江以北千里之地鞠為虛
莽鋒鏑餘氓僅僅百十之一其幸而存者亦皆亡
其家累蕩其生業裸身枵腹太半為填壑之鬼不
知當時負債者能有幾個生全設有存者未知能
有產業可贖以償納也耶然既有未教即當分付
該道詳查各人存沒符得實報然後區處虜鋒鏑
至平壤先潰城中八畜悉就屠掠其鎮留放牛馬
未知落在何所然亦當一體查驗遼民之流冗者
前後刷裝幾盡恐無漏屍然當另飭諸道窮搜遍

訪隨得解送期無負盛示也至於聞臣守空堂皆
是上年陣亡者城陷之日全家被屠雖欲責償恐
不可得此則高明所自蘇也夫慈有人可尋有物
可取則不穀自當一一討還亦何辭求免倘事
不知是則不穀亦不知所以處也唯冀公察不宣

毛都督回帖

賤价纔往差官戾止謹承惠翰辭致慙懇字字皆
肝萬之要又不以不穀為不足教力加箴砥開其
惛蔽欲與左提右擎共成不世之偉績不穀何以
得此於大人哉載感載愧不容於中向來流言導

沓不穀實未嘗有纖芥之疑乃彼此相須之勢相嚮之情愈往而愈篤固不待言即言亦詎能盡也平胡復遼自是大人度內事顧不穀所望刷耻洩恨者何嘗不顯若於是舉也谷中所示糧馬等物皆係軍興急需豈不欲盡情相副奈自揣事力萬萬不稱用是睢盱四顧不知所以答盛教也若糗糒之資發鞘之械或可隨力仰助萬一詳具公咨不復縷縷盛貺拜領外不腆土物用以侑函春暄惟順序加護以幸天下不宣

又

卷之三十四

七

別幅所示杭寺勸緣及碑記墨本此叢林勝事也
非不欲奉承盛教第有區區鄙懷不容派嘿麗氏
建國篤信竺典潘王又身入元朝聽法蓄僧故以
王子而出家披緇國尹而捨財造寺蓋其時習俗
然也敵邦則自祖宗以來尊尚儒術以三綱五常
為治教不穀嗣守家法不敢失墜唯僧徒之自相
建立者不至禁絕而已風教所關不敢踰閑顧以
重違大人之請略將二百金汗顏呈似幸自以大
人之意乞與來僧以答其勤如何如何募疏壁還
不復題澆拘滯之見想被高明一笑肅此不具

又

國家置邊郡守臣意實有在雖其兵力單弱不足以遏制虜鋒至於訶探瞭候無甚難事乃者蛇浦之警三郡邊吏不能登時飛報使浦上收圍或有
一二被搶者罪係軍律理難饒貸即已拿究將寘
三尺來帖惓惓滿紙惻怛真仁人君子之用心也
負罪之人雖不可再泣官守茲為盛教特屈刑章
與之輕比以責後效幸垂諒悉

劉興祚回帖

足下向在兵塵中眷眷以辭紛釋難為己任卒能

為兩國生靈消弭兵禍真有古策士風寡人固已
嘉歎今乃蟬蛻鸞遷脫身十層浪裡顯被 朝廷
恩賞苟非真知向背之分何以及此唯是渾家親
屬未脫拘繫緬想心事為之邑邑敝邦之與督府
有唇齒之義無纖芥之恨今又得如足下者在其
間必能調停匡協贊成無限義事私心不勝喜慰
入回姑復薄物幸領情不悉

諸宰答劉興祚

往歲足下之來不佞時得接袂竊矚心事所在唯
欲息闔解兵以紓彼此生靈之禍又其志氣鬱鬱

恒若有不安於其所處者固已得之眉睫間矣項
者傳聞足下脫身來島中未審虛的今得來帖始
知竒男子所為果若是也承已蒙督府保 奏顯
膺除擢此後樹功立名殆有不可量者欣聳欣聳
若乃調護彼此贊成休養自是足下能事不佞唯
切企望草此不悉

毛有簡回帖

敝邦洞瘳館待有闕致令足下不告別而行殊覺
愧恨唯幸不遠而復是猶不棄寡人也良以為慰
物貨收發非不欲盡情相副奈敝邦兵荒之餘市

肆擗然而行中所帶雜貨多是本國謠俗所不須
人無肯買夫所謂買賣者各隨情願以通有無也
若強其所不欲則民何以堪為此未能悉副今蒙
來示鄭重除家丁貨物外足下所帶諸種特令有
司罄儲充價以答來意後不可援例幸足下亮我
至意也各館欠貨詳具前後回咨中今不再舉魏
光禮等事曾經稟知督府無容縷縷姑復不悉

袁軍門帖

不穀竊觀自古國家興隆之會天必生奇材偉人
使之尊主庇民夷元戡難成不世之勲伐若周之

方召漢之營平唐之郭相裴公皆其人哉逆奴為
長蛇封豕存食遼左自閭下建牙寧遠運謀出奇
屢折兇鋒使方張之虜角距摧落不敢西嚮榆關
一面隱然有太山四維之勢三其沉幾雄斷不動
聲色鋤芟桀黠轉禍機號令一施旌旗變色威
風氣酸業已燁赫於遐邇收復全遼汛掃腥穢自
此將剋期以竣矣此殆上穹默佑為 皇明天下
篤鍾間氣究竟成就一夙事業用紓我 聖天子
拊髀東顧之憂乎不穀逖守藩封僚仰下風之日
久矣壇域限隔無緣輒通記室之問茲者貢路既

改行李始通敢將咫尺之書奉候起居秋序向涼
伏願為天下加護不腆土物聊效菲忱併希鑑諒
不宣

陳中軍帖

因邊臣馳啓略聞揔鎮遘禍未委緣何遽至此耶
無任驚駭之至島中諸品想皆妥帖如舊足下久
管中權素著恩信輿人之誦翕然一辭代揔留務
必有不得辭者此實敝邦之所顓望也不勝區區
懇念專候動靜薄儀附函統希照領匆匆不宣

劉副揔帖

邊遽中忽聞毛鎮遘禍且驚且訝未曉厥故物至則反致至則危理之常也遠識之士固已早知有今日矣袁臺廣收材傑想必先在渝校中矣目下島中事機何似姑專价馳候薄物幸莞領不悉

劉副總回帖

頃修一札馳价奉候邊臣傳到惠帖滿紙縷縷無非為敝邦熱腸感荷良深毛鎮被法自是天下大計督師英斷今承來示乃知贊決之力多出於左右也徐將不久當到日後區畫必能痛反前轍一新瞻矚不穀拭目以須矣防奸勘信等事謹當申

戒邊臣遵奉施行貢道近遠外藩事體唯當一聽
朝廷處分區區私計有不敢道者矣倘蒙條陳許
其從便其感如何秋清惟節宣適宜薄儀附函併
希照領不宣

黃都督督帖

逆奴匪茹自恃馬足不知天塹難越妄欲窺覷島
鎮適足為送死之資耳近接邊臣馳啓官兵進岸
擊賊屢獲奇功賊勢漸就挫衄及得伴臣所報悉
符前聞欣聳之至西望神馳擅裘之種六月興兵
捨鞍馬而爭舟楫之利作計已謬敗端又見畢竟

為貴鎮毅中之游魂耳姑馳一价仰伸賀忱薄儀
將敬並希鑑在不宣

黃都督回帖

專差遠至辱以華翰詞意懇款藹然如承面誨感
幸之極曷可言諭不穀忝纘先緒不幸遭陽九之
會兵荒相繼國敵民困至於濟助烏鎮亦未稱情
乃蒙大人過加獎厲祇以深其愧慙耳往昔倭寇
之難尊舅劉大將軍受命拯戎有大造于東土
至今海徼草木猶知姓名竟於己未之役拚身殉
義英風烈氣震耀寰宇不穀益用嚮慕不謂大人

以酷似之姿克紹前烈驟收雋功今又建牙東臨
蒼寄惠未亡之地機運巧會似非偶然勲業之就
磨厲可須不穀願徼餘福獲覩除兇雪恥之慶謹
翹跂以望耳溽暑唯冀為天下持重自愛書不盡
意統希崇炤不宣

又

皮島自經劉達之變瘡痍未起衆心涵懼狡虜之
生心搶鬣蓋亦覘知此釁爾大人適於此際建節
來臨正如李臨淮一入軍旌旗壁壘頓生精彩卒
能出奇奮威方舟上岸鏖殺虜騎大獲全勝自島

鎮朔設以來無此功伐可謂偉矣不知是何以稱
聖天子推轂分閭之盛意裁斥絕借船大義素定
豈煩來教唯是奴警始至不穀即飭邊臣續致塘
報緣虜騎遍滿海澨船路阻梗頗致稽滯殊用愧
悚此虜今來摧衄進退無所得旋自遁還然獸心
叵測邊憂未艾陰雨之戒彼此同切銘佩來示期
無失墜

沈叅將回帖

足下向者懷抱利器混迹凡曹竊想宵中自負必
不淺鮮矣及送豎倡亂禍機迫於呼吸而足下乃

能乘機奮義殲兇醜使全島生靈得免魚肉其
功足以暴於天下矣既而虜騎東搶屯據海上足
下躬領鬪艦泊岸鏖戰使賊救死扶傷折衄而遁
不穀聞此向風增慕忽蒙專差遠辱訊問揄揚過
當殊非不穀之所敢當悚仄足下討逆之功
本自卓偉懋賞彝典謂宜鼎至今承見沮當路之
示竊所深訝伏想 聖天子明見萬里綜核名實
功高不賞非所慮於今日矧茲勦虜茂績益著公
論在人其誰能終掩之哉嗚冤誦烈不穀豈無熱
腸奈外藩事體僭瀆是懼不敢輕議想高明亦能

諒悉也勉恢良圖以卒勲業暑雨唯益自珍衛不備

葉冲回帖

足下遠涉鯨海飽經危險不穀為地主館待不能
稱情恒自愧歎忽蒙辱帖開示機密為敵邦慮可
謂勤至矣深荷深荷撥島事宜誠如高見此在
天朝小則有餽餉之費大則有階亂之憂而於割
奴復遼毫無得力其利害居然可見若能撤移以
實要害地大是便計第此事須天朝自計利害
自為區處若自敵邦建請則恐外藩事體有所不

敢如何如何唯願足下西歸之日普為朝中知舊
細陳此狀或冀開資廟筭則幸甚幸甚木牌禦虜
之法果似便好已令有司差發匠手就傳製造之
法幸詳具圖樣以教之統希諒在不宣

黃都督回帖

便信往返屢承誨迪感幸何已客主交際用幣將
敬古之道也敝邦貧陋物不稱情如土產藥料亦
欠佳品致煩卻還愧慙深矣茲遣譯舌伸謝前愆
補過無咎之義大人其許不穀否乎臨楮覩汗不
既

黃都督回帖

清霜戒候海氛澄廓緬想玉帳多暇裘帶閑適差
官至謹奉辱帖詞致都雅披誦感着不穀昧於治
理國事多艱加以歲饑民困邊圉踈虞一念焦勞
寤寐靡寧竊玩惠教過加賁飭寵以暇豫之辭自
顧愧慙而已易米之請屢勤咨會已令餉臣拮据
米粟五千包以副盛需來教又至益見懇至當令
加致五千包米粟涸魚响沫豈足相潤然自盡其
意而已詳具公移此不多及唯冀為天下益自珍
衛不宣

沈副摠回帖

辱帖縷縷數百言詞意鄭重吐盡肝膈自非深情
相與何以及此披感之懷實倍常品江遊戎千里
遠來乃知晉大人作行見之真如對大人面也易
米一款備悉來意敝邦與貴鎮情同一家勢類唇
齒憂樂存亡義無獨殊貴鎮告饑敝邦其忍恣視
乎故自毛鎮以來有需必副雖以之國匱而民病
有不暇恤至如劉逖阻兵此敝邦所欲致討者然
猶運米相濟者蓋為天朝赤子不忍坐視困急
且爾時敝邦歲事稍登邊儲不至大竭故能推有

及無以盡相濟之義耳今年則異於昔自春徂夏
大旱赤地民不耕種秋來淫雨決月諸穀爛傷繼
以惡風為災穀之秀而向實者悉皆立枯八路皆
然有大命近止之憂有司方講求荒政而計無所
出日者督府屢咨請糴情意懇至不穀不敢以歲
侵為辭已令餉臣辦得五千包以應之今者江差
之來復為此幹而懇迫弥切當令加致五千包固
知輕尠不足以相贍然敝邦之力盡於是矣貴鎮
官民來往兩西道路如織西上事情何所不悉亦
嘗見農家所收有可以卒歲而能推以及人公家

所蓄有可以自給而能分以與人耶布帛菽粟有
無相資古今之通義也豈為利人實以自利苟能
有餘於己何故不肯通糶唯其自就枯涸故無以
潤物此其情誠戚而其理亦應爾也願大人諒此
真情轉白摠鎮不勝至幸仰恃厚眷覲縷至此悚
息悚息不既

黃都督別帖

交際之有幣所以將敬非以為貨日者再致薄儀
只用自謝不敏竟煩塵却不穀慙之至豈敢更
浼且念前送劣乘品駕不中驅策聊以自效土產

豈敢論價區區鄙誠未蒙收領此不穀之益用踧
踏者也茲因候价別申微忱仍將馬匹復塵清操
唯願諒此深情特垂莞留千萬是望不宣

黃都督回帖

任都司遠來備承動靜第所賫咨帖毀於鬱攸不
得窺攬辭指因都司口律略聞梗槩認是導旨
獎籍一款不穀無任踧踏之至送奴借舡紀島校
計叵測敝邦之嚴辭斥絕大義當然此何足以上
煩天聽猥荷獎勵之恩哉大人之為不穀地
一至於此銘感則有之揆分自省翻增悚報易糧

之請已悉於前後咨復今見都司細聞西餉久斷
舉島阻飢之狀不穀當餐輟箸不啻由已飢之我
民之捫腹有不暇顧即令餉臣加辦粗細穀七十
色以副來意統希諒鑑不宣

黃都督回帖

差官至敬接華翰披繹感悵曩日麾下之變凡有
血氣所同駭憤不穀忝守藩翰豈容坐視擬問之
舉於義當然幸賴 皇靈遠被亦緣大人威惠默
身旋覩廓清之慶不然區區一紙文告詎足以董
禍心而弭兇焰哉今蒙來示反增慙悚新元建候

唯冀鼎裊益福薄儀不足酬盛貺聊將微悃統希
鑑納不宣

沈副總帖

續接邊巨馳啓登餉久絕島中方有呼庚之急不
穀聞之惻然傷心食不下咽敝邦遭上年大侵中
外赤立麥秋未至道饑相望雖欲盡清相救有力有
未逮然不穀為地主响沫之義其忍翹視頃得督
府咨會方擬馳一价相款另議通糶之方兼有講
定約束者而恐往復之際或致遲延即令餉臣亟
分軍食三千包刻期運送想不久當到庶少紓島

衆渴急也持咨者繼此當發姑不一幸垂鑑在
黃都督回帖

不孝獲戾于天祖妣見背攀踊摧隕靡所逮及差
官至謹承惠翰兼接兵部咨會傳諭 明旨獎勵
有加無非出於大人揄揚之盛載感載媿不容于
中荼毒中言無倫次統希盛諒不宣

黃都督回帖

頃聞島衆乏餉聊致三千之米以資斯夕之急若
曰售價一何見待之薄也媿甚媿甚西輝阻梗義
切急病故有月買之舉比聞天津餉艘已發想自

此舉島宿飽無所待於區區之响沫矣幸甚幸甚
荒迷不悉

黃都督謝帖

高秋戒候海氛澄廓緬惟玉帳清暇馳僚區區小
醜稽誅久勤戎行想今已就掃平曩者小譯輩在
登遭亂脫身逃生急於返國自犯邦憲乃蒙大人
曲加矜恕不唯不寘之法又濟以舟楫俾得生還
鄉國自非深仁厚義豈存敝邦何以得此載感載
媿無以言喻姑憑便附謝兼致薄儀統希崇諒餘
具咨復不悉

龔共汝璋謝帖

以下續稿

不佞昧於衛生身抱沉痾不聞大人傳長桑秘訣
敢因家弟敬叩下風唯瀆浼是俱幸蒙厚誼錄示
妙方副以珍劑况四種腆儀尤非始望所及自顧
薄劣不敢拒卻盛意拜領之餘益覺摧感所示病
錄深中賤患源委謹當按方服食庶幾此身復作
完人乎感幸感幸附便草謝薄儀幸笑留不宣

黃監軍回帖

辱帖詞旨縷縷愈往愈切不穀寧不感惕大人為
沈鎮之馬欲得駟駿以資捷伐此實軍前急需勦

虜大計以敵邦同仇之義豈不欲盡情相副但以
敵邦本不宜馬而近復存經寇難物力凋瘵旣救
皆空百匹之馬固知不足以濟事而計出窘急自
覺慙汗旋念大人懃懃有加至誠動人不穀亦有
熱腸豈敢以竭乏為辭謹令有司悉力拮据通前
湊得三百之數仰副盛索此於緩急供用誠為眇
然其在敵邦困廩已傾倒矣物不稱情彌增愧悚

谿谷先生集卷之二十四

欽定四庫全書

卷一百一十四

Blank manuscript page with vertical columns.

谿谷先生集卷之二十五

五言古詩一百六十二首

感興

俛鬼為虎役既悟還自悔可憐世上人疲薻迷真
宰京華多冠蓋翕赫流光彩富貴豈不羨識者憂
其殆任重負版踣懷璧匹夫罪蕭蕭衡茅下中有
至樂在

鴻鵠倚六翮一舉凌天倪天長霜雪多苦飢常酸
嘶不如埒上鷄飲啄安其栖高才多落拓闡莖分
組圭乃知龐德公甘心隱蒿藜

山寺與趙金二友有約不至

晚夏草木深山寺多清陰閑人坐永日起立披鶴
襟仰睇閑雲飛側聽清蟬吟含情咏茂木引領懷
斷金幽期已晚晚曠抱增湮沈恐彼鷓鴣鳴山中
難可尋

寶劍

寶劍光炯炯出自歐冶手入水作蛟龍埋獄衝土
斗未試天外倚空聞匣中吼持贈傳介子願取戎

王首

芙蓉

人愛衆卉茂我憐芙蓉清亭亭出深沼濯濯當回
楹纖莖立更直危朶高不傾馨香匪外襲穠艷真
天成後凋惜無華碧鮮徒自貞亮比君子德宜寄
美人情

哭金而好

羨質天所賦出世若有期奄忽不少留此去何所
之脩短不須論孤寡不足悲精識一湮沈千秋復
何為鬱彼廣陵土歲此明月輝已逝難可追不亡
誰得知

酬崔子謙

造物真少兒故來橫相阨子病已一年吾足不任
屐比鄰各閉戶會面安可數佳句時往來天機終
不隔秋氣爽萬物南山有佳色朝來望蠶峯白雲
正可掬惜哉負幽賞安得羽生腋

遊華嚴寺

我在城市中囂喧動幽疾發憤脫塵羈
遊尋到淨刹茲區久擅勝面勢實爽豁
千峯在眼底飛雲坐可掬落日映遠海
光景更奇絕曠蕩散遐矚岑寂專幽室
動靜各有適俛仰俱可悅漸得新趣深
忽覺舊病失吾人寓此世至樂不在物
靈源苟無累

觸境儘快活遑遑名利子何事長疲繭真境豈我
遠蓬心自難撥念此發深省惕焉增淙雪簪裾甚
極枯一嬰不可脫幽興信難忘浮榮那足說題詩
矢雅懷密邇證西佛

悼夭

吾生未三十慣經人世悲天下寧有是二旬哭四
兒長女已九歲季女纔周期次女適七歲秀惠無
不知阿鐵最難忘憐爾毛骨竒時嗔亂書帙每苦
索素梨平生眼前事耿耿留心脾掌中四顆珠一
朝人奪之嫩蕊正妍好風雨餘空枝棄置強寬抑

念來難自持輿尸瘞空山四塚相累累慟哭向蒼
天浮雲為我遲積惡召殃讎怨尤將何追緬懷東
門吳情累還忸怩

雨中寄畸庵子

浪浪簷間雨盡日聲不斷弊居苦湫隘門巷泥濘
滿本自冥徃還何怪今絕罕伊我方抱病性復愛
散誕舊嘗嗜讀書而今此亦懶小窓寄息偃露頂
且裸袒靜居觀物理煩心自滌浣羣生共宇內萬
品歸一算登高與居下未可較長短瓦礫各有適
何曾慕珪瓊大鵬彌天隅詎可小鷲卵達人貴無

累心地恒蕩坦君看逍遙周豈學呻吟緩詩牀及
碁局藥爐煎茶盃自足了生涯無為強悶懣城西
畸庵子實我同志伴同病但相憐無由數吐欵

遣興

大風西北來吹我茆茨屋雲烟相湏洞溟海互翻
覆皇天意難測屏翳誰能戮擁被不敢睡窓櫳撲
沙礫

治世急賢材士不守丘園紛紛九衢內日夕爭馳
奔功名湏及時要路多攀援惟有玄晏子卧病長
掩門

甲寅除夕有感

今年今日盡明年明日是三百有六旬迅速如流水念昔稚少日歲時心獨喜不辭惜光陰遊戲窮閭里心情隨歲變萬感紛已起壯志百無成盛年不可恃古人重三餘籍此足文史憂病坐鹵莽有覲對案几元貞有常運壯衰有常理德業苟日新豈復傷髮齒來者尚可追自此須更始題詩以自訟不寐達晨晷

讀魏其武安侯傳

執力位迭衰盛英雄難自由艱難易感激盃酒成仇

讐丈夫重意氣輕將身命
酬可憐灌仲孺終累魏
其侯

歸田漫賦

以為農山澗曲
病海雲邊為韻

丈夫有詘信不遇無不為
沮溺與龐公避世皆我
師譴廢父家食十口恒啼
飢歸曰不可緩須趁耕
耘時

舊業海山間瘠土歲多凶
終年勤四體未足還租
庸荒堰久不治苦被濤頭
衝學稼術未精便欲師
老農

下田多近海高田多在山
今年苦春旱耕種皆頗

蘇朝出課僮僕日暮聊獨還食力良已勞但喜無
厚顏

種稻若無水鑿渠引山澗澗淺水易涸農夫窳所
患饑歲食糠粃短禪不至斲四民農窳苦不如學
巧宦

耕田南山側結廬北山曲朝出到壠上暮歸理書
策旁人笑我勤我自以為樂始知請學稼猶勝問
干祿

煌煌青瑣闥賤迹昔曾浣踰分果招灾廢絀職此
坐明農聖亦云在我計非左力作纔足養閉戶長

高卧

人心如日月本來皆清淨利欲多蔽晦紛紛事起
競農夫雖作苦却不枉天性君看負肩子夏畦未
為病

權利互傾奪富貴足吝悔鹿門傲諸侯遺後無危
殆我有數頃田力耕可無餒為農以沒世何必浮
于海

今朝天欲雨起視西北雲田家悶久旱瞻仰徒自
勤汙邪已生塵况復原與墳閔澤瘁下民欲訴天
肯聞

卷之二十一
一
作官欲行道失意因歸田始計良已謬晚途聊自
全勤勞畎畝間游戲桑麻邊豈敢求贏餘願給粥
與饘

留贈金櫟翁

先朝盛人物前輩多英豪煌煌白玉堂蔚蔚神仙
曹流風邈難攀景仰徒自勞喜子游其間周旋自
非髦諸公多賞拔不止一言褒薰染足異聞卓然
文義高譬如觀溟渤所見皆鯨鰲中年人事變飄
轉隨風濤至今已七十白鬚長眉毫從人常寄食
一飽不復饗攻詩多竒語毫管手長操放歌自寄

趣有時愛禪逃我來峽中縣邂逅相遊邀唱和富
篇翰痛飲隨醪糟留連雨不厭膠漆未為牢忽此
欲分張悵馬心忉忉我生實嶮崎曠懷追嵇陶常
苦處濁世日聞衆口嗷誓將與夫子共理秋風舫
東窮十洲勝度索偷蟠桃坐闕夸毗子膏火相煎
熬此計竟蹉跎離合紛紛滔滔贈子南華編神交游
濮濠安排入寥天馬神而輪尻

秋夜

悠悠去京國鬱鬱客湖左
蒯緱彈自歌籜冠軟欲
墮旅食足酸辛索居長慵惰
秋夜坐觀書寒由撲

燈火

漫興

朝起懶盥櫛散步眺原野濛濛水氣浮冉冉山雲
惹家鄉阻音書節序過秋社賦詩渾漫興不敢論
風雅

青青墻底菊託根真失所芳心困風霜駢駢雜塵
土故園手栽遍而今長幾許歸期趁重陽濁醪還
對汝

客居逢驟雨有懷時庵子遂成二十六韻

雨設如波濤颯颯入高柳虛齋睡初起涼氣襲衣戶

牖氛埃一洗盡快若去身垢坐聞南溪水狂漲殷
雷吼脩然領佳趣恨不共我友我友抱逸少心妍
獨貌醜廣文飯不足谷口親畎畝百事不挂眼攻
詩更耽酒直道莫容身踈蹤動多口射策入南宮
穎脫破的手君門邀不里猛噬歛見喉仍纏漳水
疾鬱悒困針灸逆旅飽羈愁部屋擊草莽惟我臭
味同宿昔交情厚一日書再在一旬門十扣相逢
輒敷腴講劇發蒙鄙有詩贖我行字字敵瓊玖別
離豈多日忽若三秋久沈疴幾何瘳麴生稍近否
吾人雖院窮意氣頗自負文章乏世用自足傳不

朽古來磊落士趣捨良不苟千金價已重不肯捐
弊帚君看子雲書豈曾覆醬甑窮途有至樂薄俗
任嘲咎南歸儻相過此理得細剖

患河魚少愈信筆書懷示清陰竹陰

薪貴埃不黔弊褐苦無燠寒淫龍衣肌腠浸漬鑠心
腹河魚驟作痛不暇問窮麴鈎棘攪胃腎昏毒劇
割剥叫號自宛轉憤亂失知覺五官各無主百骸
不相束候問傾里閭省視煩親戚倉皇謁醫師顛
倒迎巫祝性命須臾間不語內自感委頓渙昏明
藥餌飲荼毒神明幸扶持俄頃稍蘇息乾坤再開

朗營衛無慘黷眼前骨肉聚驚喜動顏色據几一
酣瞑茗罷催煮粥人生一世間血肉成軀殼六氣
迭外侵百慮紛內蝕生老病死苦萬古一火宅嘗
聞古至人不為形骸縛是身如浮雲生滅了無着
鼠肝與虫臂等視泯悲樂迥出陶鑄外洒然常自
適瞿曇闡解脫漆園明澹漠至理亮斯在妄心難
自克小疾一疥癬神情遽崩迫此生可憐慙何地
破茅塞作詩示知己茲理細揚摧

哭鄭裕叔

哭君淚不乾送君歸北邙人生本如寄何論短與

長識君姻好，間愛君性溫。良窮厄兩相保，意氣凌
風霜。天高鬼神惡，性命難周防。紛紛祭黜兒，白首
誇軒裳。天關一布衣，莫是為善殃。老親哭撫棺，少
婦啼空牀。無事不酸鼻，逝者應都忘。冥冥黃土裏，
長寐無何鄉。

金而好改葬挽詩

我友入地來，歛易十寒暑。泉臺日月闕，誰與為儔
侶。吁嗟子逝後，世變遽如許。觸體詫南面，達人非
誑語。君家禍釁積，季子痛創巨。水齧驚舊封，吉兆
新得所。扁舟泝江漢，五喪同時舉。扶服力未逮，後

死翻慚沮君真了事人去來無礙阻累然一蓬科
不是君住處

蛟窟分韻得樂字與紫元仲淵天章同賦

萬派合清漢
奔濤觸崑崙
豁開水府陰
沉闕幽壑
神蛟穴其內
窟宅何磅礴
涵淹蓄靈怪
顯晦任潛躍
造化在掌握
雷電隨揮霍
威靈吁可畏
惠澤亦云博
存身或藏蟄
固異求伸鱗
端宜享芬苾
秩禮視水伯
難揮飲飛刃
敢投宣伯藥
我來屬暮天
小舟巖下着
危崖壓重淵
老木托縹緲
絡有時空洞
裏鞆鞞狀合
樂信知神物
居森然為動
魄安得起

潛靈瓜尾者矯攫飛騰沛甘澍與民慰焦灼無然
恣橫悍賊害效潮鯉詞客解上愬帝譴良非薄為
爾示良規點筆留新作

入秋數日頗覺涼爽既而毒熱轉增甚於長
夏病暍無慄遂成二百字

新秋稍清爽數日來商飆謂是金候甫老火不復
驕居然更急怵懨懨彌難聊昏暍挾霧雨熾曝劇
焚燒淪池息織紋高樹停調刀輕締若衽革棠館
如藏室而我處湫隘陋巷甘簞瓢赤日烘短笮爍
體融脂管寧論舊疾動渴肺成中痛有如鬻中魚

宛轉待爛焦揮汗倚愁櫃急喘聲哢哢入夜轉鬱
蒸殘暑何曾消枕簟諒徒設轉輾徹短宵舉頭呼
蒼天徑欲斡斗杓元化序四運一氣寧獨饒龍火
既西流酷融行可祧奈何尚不戢毒燄扇赫歆便
恐帝載瀆六合多昏秩書生敢自愛微命同肖翹
百感集孤吟無人采我謠

苦雨得南字

恒雨苦霖晦乾坤如函三二曜隱光景師伯恣驕
婪雲奔競向北颺起偏從南浩蕩迫昏墊端憂閉
茅庵

喜晴

久雨乍晴好勝似不雨時長風從西來吹我庭樹
枝整髮據槁梧嘯詠心神舒懷哉故園與飯稻仍
羹魚

伐叢榛

屋後蒼山足叢榛鬱以蕃藤蔓雜與草蒙幕如籠
樊虺蝮所竄伏狐狸所戲蹲常愁鬼物憑白日騁
妖昏芳蘭尚可除矧茲惡木根命僮孺長鏹芟剪
靡所原強硬或難制斧柯時可援蘊崇若山地悉
付猛火燔居然見清曠萬象森開騫魑魅與虫蛇

錯愕爭崩奔蕭爽涼颼入赫奕陽暉曠異石露竒
姿嘉木秀幽園翁姥為改觀指似相竊言因知淑
慝理莠去苗乃存惡惡不疾去此誠良所敦

歸興

今晨忽不怡驅馬出都門行行越川陸適彼海上
村海上殊僻陋而無塵世喧航稻滿陂田棗栗遍
中園比鄰四五家頗有古風存雖無軒裳侶聊可
共晤言海味薦鹹腥村酒盈匏樽醉飽了無事歎
咏傲義軒人生貴適意窮達何足論窮達何足論
世事多覆翻

茅屋新成漫詠

草屋只數間經營多苦心
蕪葭秋可覆榆柳寒仍
陰雖無丹雘麗足庇風雨
侵免為鬼所瞰幸與愜
幽襟不羨啣泥燕自託華堂深
差勝山中鳩無巢
集空林

焚香

清夜坐焚香香烟裊裊起火盡烟則滅烟滅香不
死只是看不見定在虛空裏何緣問香嚴證得圓
通理

余病寒而嘔見羣蠅逐臭而至就食嘔噀因

以溺死伏枕漫成

癡蠅凍不死羣飛何提提曷不守孔隙與物無咎
疵營營嘔吐間所得之已微終然就溺沒飽腹為
流尸止棘古所疾爾死無足悲堪為小人戒一笑
因成詩

寥天一齋四首

以寥天一齋為韻

大道本無相窈冥而寂寥紛然萬化馳羣動爭喧
囂至入體自然重玄一時超非有亦非無即此真
道遠

色則是玄黃形則是方圓離形亦離色強名為自

然物物各具足求之則至焉勸君細認取人未始
非天

此物是何物亭亭獨無匹看來無可見覓處轉相
矣當年赤水止象罔手脚疾莊生錯饒舌喚作寒
天一

欲近却轉遠欲合却轉乖不如摠無心泯然與化
偕我屋雖甚陋有此標名佳真令顏氏子千古擅
心齋

飲酒自解

我本不能飲每被酒客笑及此抱幽憂頗用酒自

療村醪雖酸薄箇中自有妙傾來輒醺然不待數
杓醕閑愁忽銷融渙若雪投燎兀然忘身世隨意
發歌散當其得意時興與嵇阮肖却笑病醕人十
鍾恣狂叫

自銅雀津乘雪馬至鷺梁戲成俳語十韻

雪馬者以木為之上如牀下如舟人乘其
上輓之以鞞行于水上甚駛而穩俗謂之

雪馬

非鬣曷稱馬行水何取雪機便不費力勢激難緩
節颺馭謝轡銜飛輪絕軌轍走丸翻覺遲激矢須

讓疾脚戰萬雷輾眼眩千電掣却怕駭潛虬徑欲
趁奔日縱快蓄或隨履薄戒仍切雖無風波憂恐
有顛沛失千金敢自輕萬事難可必不如即坦途
徐行安且吉

寄俞子先

余以罪廢居京師凡六載困於食貧且為
狷狷者所仄目遂携妻孥歸海上別業有
汗邪數頃日課僮僕斬伐草萊種藝稼穡
以為卒歲計其隙則讀書著文行吟釣游
以自適朋友之在京輦者聲問漸踈而俞

君子先亦不容於時今年春暫食于湖西
之結城結城在西海上去余所住數百里
而遙既數月而得其書極道其離索契闊
之思因請余詩文以為異地面目蓋子先
之南歸嘗就余告別矣夫嘗索余贈言乃
今始有請焉殆是窮鄉閭寂中轉憶親友
欲得其文詞以慰其思豈非所謂去人滋
久思人滋甚者耶嗟夫士之遇不遇何代
無之然其所謂不遇者只是不得於朝廷
而已若乃優游暇豫之樂知舊過從之權

財反有便於處顯劇者豈若吾輩怵惕極
遑無地自安不能安其室廬合其親昵星
分而鳥散如今日者哉亦可謂窮甚矣夫
雖然此命也時也安時而知命者無入而
不自得不如是何以見君子夫以嗣宗之
達不能無慟於窮途以其未聞道也斯義
也願與子先共勉之

去年我歸農今年君贅居共住海濱頭迢迢南北
踈我生本骯髒散材同櫟樗固應投寂寞辛苦事
耕鋤君真青雲器義價超璠璣少年負直氣奏牘

驚公車曷不簪彩筆出入承明廬
鵠來江海上浮沉侶鯢魚君家相門後
諸父方得輿玉樹在階庭不得同茅茹
文章解窮人况我竊虛譽年來焚筆硯
棄擲等土苴子何獨見憐固請煩手書
恠君嗜好辭意氣還起小滄溟渺無際
極目連歸墟魯叟欲乘桴浩蕩將焉如
九夷不可居幽意與誰據攜君訪廬敖
汗漫期相於

哭宋文永叔

昔余初決科濫廁槐院選同寮多同志
國器皆瑚璉惟公為之長嶷然推冠冕
脊梁硬似鐵疆項不

少俛屬當選舉際衆議頗乖舛公能持風裁一語
起罷輒而余實無似得公稍僴勉無何遭厄會我
輩寂屯蹇鞍馬來益間處公何泯忍西羌速天討
將有三師遣幕職衆所憚此行公豈免袖中三尺
鐵奔鯨不難翦意公贊謨畫功名行大顯天高鬼
神惡人亡邦國殄一醉遂不起羈魂西塞緬旅櫬
發天涯邊風丹旄卷期公千里足一蹶永不展人
擠固應爾天掇理難辨念公西去日而我負祖餞
幽明積沉痛危涕十行淚

生朝書感

三十二年前今日黃昏後此身始墮地四大為我
有荏苒閱三紀朱顏成老醜事業百無成孤露東
西走無能報劬勞俯仰慚高厚直令活七十年生
已虛負男兒出世來不應長鹵莽法門一大事儒
家三不朽終須早樹立莫遣傷白首

感興十四首和畸庵子

唧唧何所歎悠悠臨歧路君子抱孤貞黨人多病
妬誰知桃李花本是無言樹許由逃天下里人疑
竊屨去去絕濁世冥心遊太素

荆玉隱璞中長與頑石鄰一朝遭卞和琢磨為國

珍雖增連城價無乃毀天真繁文滅素質義名戕
其身至入貴沈冥處世混光塵

威鳳出丹穴五采光陸離浮游覽九州啣圖欲來
儀竹實可以食梧桐可以栖入窠正慘黷罔羅連
雲霓擊卵不自保怙悵將安歸去去崑山岑逍遙
樂忘飢

愚者昧視聽詰人識幾微伊川見被髮百年為戎
夷海禽知天風遠身來郊圻所以梅子真一去不
復歸

端居何所事幽默觀化機陰陽播萬物鼓盪紛參

差性命一以定智力無所施羣然事趨營但為鬼
神嗤御寇論力命子桑有歌詩寄語夸毗子無然
徒自疲

清晨登高立舉目覽林坳草木盡零落山谷空崢
嶸可憐衆芳地但見冰雪盈豈無松栢樹慘淡無
光晶何時見陽春萬植同滋榮

高鳥墮羅罔只為戀飲啄渺然雲路迥何往不可
適軒冕為樊籠利祿為醜毒沈酣不自寤卒與禍
機觸誰能學園綺韜光飡草木

老馬病無力垂耳卧樞下毛骨已凋喪粥之無顧

者却念子方言不忍棄原野惟蓋有古義薄俗知者寘

醢鷄生饕盜不識乾坤大下士局淺見聞道笑且恠豈知古至人默與元化會超然凍性命萬劫不曾壞姑射非誑語廣成有遺誨我願學其術飛昇出塵外

貞士如玉雪讒人有巧舌浸潤工入腹萋菲解銷骨萬古一機阱土中多碧血宵雅欲投畀惡惡語徒切空令覆盆人飲泣號蒼旻

任公釣東海期年無所獲一朝得大魚鬣首鼠如山

岳脂膏飽千里異事傳簡策雖為人所稱於已竟
何益不如釣鯢鮒朝暮得自給千金學屠龍破家
為人嗤寄語漢落士材大終難施

諸葛起南陽鞠躬事先主馳驅戎馬間拮据闢草
莽中原不可得嘔血徒辛苦不如鹿門翁終身隱
農圃

瑤臺有珠樹粲粲含英蕤栖集雙鳳凰羽儀何光
輝驚馬颺振天地霜霰紛摧之鳳去樹亦空懷哉令
人悲

烈士殉名義殺身忽若遺豈不重七尺寸心不自

欺鮑焦槁河上之推為烟灰高節照千古長為後
人悲優游以卒歲仲尼真吾師

踏青日卧病信筆書懷

春序忽以晚茲當三月三長楊碧嫋嫋細草青
毵毵天桃與穠李紅白開相參况值新雨餘澄
鮮晴景含芳辰世所重時物佳可探水邊多麗
人陌上交驂驪新粧鬪粉墨核服襍茁藍日暮
歌管動扶路多昏酣伊余宿抱病避喧卧茆庵
經旬懶盥擲短髮垂鬢髮參藥果滿牀頭書帙
拋塵龕悄悄苦無惛默默長如喑靜思百齡期
飄忽風中嵐青陽失

歡娛衰白增憂悵強欲學年少奈此病不堪靜蹤
各異趣棄置無多譚

田家秋興四首

霜前早稻青霜後晚稻黃穡事不可緩鴻鴈滿陂
塘田家苦耕耘及此喜登場官租得輸納幸免追
呼忙殘年飽喫飯鼓腹歌虞唐

右穫稻

澤國不宜麥高田猶可種燒畬勝糞壤不勞事培
壟但得冬雪多豈怕青苗凍兼須百畝秣足充麩
藥用明在幸有秋十口醉飽共

右種麥

蹲鴟宜沃野荒歲可代穀我圃寂重此頗費抱甕
力秋魁動徑尺一區收一斛深窖藏不爛地爐煨
易熟留作歲暮計道人生活事足

右藏芋

屋後十畝園候粟何蓁蓁秋實競罅發爛然鮮且
勻况闢健腰膝味珍仍益人園丁日有收波及遍
比鄰寄語太史公何必誇燕秦

右收粟

賦得溫泉送溫陽金太守

温陽有温泉靈蹟著千禩潛燄熱地脈神湏漲清
泚歎噓泄氛霧湯盪漾涵光晷豈惟布滋液實能祛
痰疝一漱滌厲已再滌札瘥起蘧蔭與戚施匍匐
如歸市我願賢太守觀此推化理虛明善鑒別深
雪絕汚鄙一蘇凋瘵眊惠澤浹百里他時治行聞
應降紫泥璽

哭鄭亮之

識君好心事親君猶骨肉君才一何長君命一何
促鬱鬱通身膽堂堂報主略一朝困二豎冥冥
歸窀穸干城更誰倚大樹空摧落眼看屠沽子立

地縮金玉四十一墨綬百戰功未錄羈魂泣海嶽
旅櫬滯湖曲薄命憐我妹餘生如晝燭長慟念存
沒淚灑南雲黑

古意

長安十二衢馳道通未央平朝禁門開軒蓋鬱相
望黃金絡馬頭朱衣爛生光行者不敢近意氣何
揚揚借問此何官御史侍中郎出入青瑣闥彈射
陳皂囊顧則承意旨傾奪爭毫芒朝為同袍人暮
成劫與羗上堂語昵昵下堂弧矢張庖人烹大魚
小魚在腹腸大魚與小魚同類還相戕物理自古

然君何苦歎傷

塞下曲

烽火照長安羽檄若流星匈奴十萬騎大入遼東
城將軍格鬪死落日無戰聲誰道健兒勇束手如
孩嬰流血滿城壕衢路尸縱橫黃金百橐駝馱入
單于庭嫋嫋良家婦足不出戶扃繫纍穹廬中欲
啼不敢鳴胡兵日乘勝胡馬日橫行安得漢飛將
屯兵右北平

李牧在北邊蓄力固儲胥乘時奮其威一戰滅匈
奴蒙恬為秦將築塞樹長榆拓地千餘里漠南無

穹廬邳都守鴈門先聲龍言單于牧馬不敢近邊境
常晏如壯哉三子者雄武後世無誰謂長城固帷
幄有良圖誰謂鐵騎健縈帶莫能踰君王得猛士
四方自無虞

三河惡少年幽并遊俠兒雙鞬挾雕弓駿馬黃金
羈應募出塞垣防秋遼水湄鉉鉞鐵柄褱螫弧三
丈旗連營列戈矛擁柝登城陴一夕羽書急匈奴
入令支輕兵赴戎陣盛氣縱橫馳冰河半夜渡北
風裂膚肌孤軍絕後援主將失機宜戰敗鼓聲死
空卷何所為捐身蹈白刃膏血沾川坻羞作李都

尉生降拜蠻夷

哭黃兄悅之

吾兄秉愷悌賦命一何奇髻亂喪慈母欲廢蓼莪
詩讀書學干祿苦被窮鬼欺麻衣四十年藜藿不
充飢縱使白頭死身世足嗟咨壓溺死不吊禮傳
有微辭漲水怒蹴天黑風翻蛟螭不是被髮叟兄
何苦渡之神明不可恃一壺那得施慈父哭呼天
狂走長江涓弱妻領羣雛腸斷筮篋詞幻軀逐驚
濤幸復冒洲坻三寸木皮棺送之蒼山隱魚鼈與
螻蟻逝者何偏私人生有禍福借問主張誰報施

理難測造物真小兒平生託中表歡愛同連枝一
別隔生死重泉杳難期酸風吹淚斷慟哭有餘悲
楚此不成歌魂去歸何時

滄浪子寄乾薑有詩次韻以酬

薑号藥之珍功用一何長味辣稟剛金氣煖含真

陽乾釀有妙理造乾薑法淹漬水中愈風安胃腸

本草乾薑主治風溫中療腸澼圖經豈妄云炎帝親所嘗故人憐

我病遠寄到窮鄉一餌腰脚健不煩人扶將瞑眩

豈敢厭敬服箴規良

再用前韻寄滄浪子二首

崔子似晏嬰身短才則長學貫天人際餘力通陰
陽與我同臭味知爾好心腸窮途各無藉脫粟要
共嘗我抱公幹病竄身雲水鄉贈我雙鯉魚藥物
以侑將作詩謝故人併示諸友良

多病怯寒早少睡知夜長居然歲聿徂葭琯迴微
陽故人別來久日夕空回腸豈無青樽酒寂寥誰
與嘗那能相煖熱慰此涸陰鄉慇懃一札書欲寄
無人將勗爾歲寒意共保德音良

聞滄浪子歸嘉平舊隱復用前韻寄贈

陰風吹朔氣鶴鷺鳴聲長君子意不適驅馬出洛

陽惻愴五噫歌輪囷九回腸朱丹恐一跌酸苦甘
所嘗垂綸寂寞濱種樹無何鄉藥畧向來有書笈
亦攜將寄語問吾友歸田計已良

送白川李使君

隱之酌貪泉猶自清如水使君向白川白川佳可
喜入白勝川白名實信兩美請看報政日吾詩非
戲爾

熊嶺

蒼崖擁其西峭壁臨其東中有九折阪鳥道盤層
空高高上無盡回回行不窮絕壑坼厚地峻標撐

蒼穹引手揮落日振衣來天風余乘使者傳攬轡
行湖中湖南一千里官道九軌同連山東北來勢
敵岷峨雄念昔邃古初隔閼如蚕叢誰哉五丁手
鑿竅歎煩神功羊腸一線開遠邇輪蹄通我來感懍
慄屬此西侯終嚴霜脫衆木林壑寒玲瓏松摧挂
巖磴石怒厯厓深僕夫輟鞭筴顛倒御史駭攀躋
陟冢頂豁若鳥脫籠男兒四方志安用守房櫬垂
堂雖冒誡叱馭敢忘忠澄清期稱塞歸報明光宮
憑高一長嘯目送摩天鴻

山行記見

山如蕉葉卷一掩復一重
龍從簇群木雀穿
懸危峯霜凋氣候凜
風起林壑洶旭日
曛不吐宿霧靈仍封
惟聞幽咽響不見水
石春鼉驚失舊窟
虎過留新蹤畏途
惴幽獨嚴程策踈慵
遊方子道缺叱馭
臣職恭報國忘夷險
將母念尸饔撫劍一
悲吒拈筆發春容

贈赤裳山僧

芳茵如佛耳
山自枯樹幹
採摘充鼎實
肥脆勝牢麩
霜梨美人頰
色香味三絕
爽若甘露漿
足慰文園渴
我病喜淡食
長路苦煩醒
行厨難自給
官餉

厭葷腥山房逢二味客子為加飡珍重謝山人此
詩還可刪

山中阻雨遣悶示二僧

我到裳山上欲登按廉臺山靈却好劇飛雨滿空
來為向山靈問緣何苦見猜應嗔擁傳客踏破石
門苔

辯真二衲子同我娶訾生我病早衰換霜華入鬢
明山中連曉雨三日滯嚴程禪窓共軟語寫此旅
遊情

參星謠

參星復參星與君偏有情南行五十日每日見君
橫有形寄字內役役長勞生三光在天上何事東
西行岨夷漸升彩殘月已西傾參星不可見吾獨
向前程

送海西巡察權靜吾

東方千騎去雙節前翩翩借問向何許海甸國西
偏澶漫二十郡表裏山河聯工風既雕悍甲兵精
且堅西連大淳海舟楫通齊燕北接遼碣路茲焉
扼其咽逞者國有難逆氣遂滔天長驅指圻輔兩
西盡貫穿魚淵血已渾馬灘尸欲填到今鏖戰地

殤鬼哭寒烟哀哉凋瘵民幾時得息肩孺困飛
輓丁壯斃戈鉞夏序久不雨嘉谷皆焦拳殷憂形
玉色虞業撤庭縣權公何侃侃直如朱絲絃端宜
處臺省遠猶陳厦旃朝家重藩維爾煩旬宣福
星臨一路災害應自蠲登車志澄清發政在惠鮮
墨吏解印綬疲氓安井廛芙蓉好池館十頃披紅
蓮明粧執絲管鄴醜如流泉豈足解憂勞四封多
顛連脊令飛且鳴螭軒莫述遭期年報政成三侃
朝日邊

送姜吏部復而從濱使往關西

往在百六會國命如旒綴康回圮地維鑿齒吞
噬彘倫一以斲人道同狗彘傷哉 太社業墜地
誰拯濟 五廟有神靈忠臣定大計 東朝復名
位武帳陳儀衛天命集聖人大統得復繼乾坤不
擦黷日月閃昏曠義聲彰四海請命明明帝明明
聖皇帝照臨一何諦降勅錫封爵 恩光逾舊例
銀璫兩高品擎詔下鉅砌浮海淨如鏡吳若戴履
珍藩邦候使星賓館飭牢幣溫溫永嘉公受命
迎送際承紹極才望崑玉映丹桂姜侯膺妙選習
禮仍多藝天官重郎署藻鏡傾一世含香輟清切

擁傳行迢遞嚴程出關外驛路連海澨行行閱儲
侍一一察抗弊而陸困兵荒赤立堪流涕那能供
餼牽得以這罪戾饗賓戒踰禮蘇民在推惠繁文
要擺落猾吏痛裁制征途屬春序物色輸眄睇濃
花明野館官柳拂行袂江山大同勝樓觀百祥麗
杯杓慰他離嗟哦遣恣懣漳濱抱沉痾藥累淹時
歲蒙君數記存令我豁昏蔽忽此別知己何啻分
伉儷病懷倍作惡離腸轉柔脆賦詩贈君別縱筆
雜草隸君還見憶否有書頻附遞

上芝峯先生敬謝臨貺

喧喧西郭門廣陌連九衢軒蓋日結轍金緋耀華
裾朱門盛逢迎綺食陳笙竽寂寂張仲蔚謝病長
索居室中何所有顛倒一床書不見載酒來蓬蒿
春雨餘今朝有異事街巷聞傳呼惠然長者車門
外立踟躕延入方丈室語語為敷腴貧家無長物
何以奉歡娛却慙林野人酌醴焚枯魚聊憑紫氣
書共探赤水珠是日共論
五言

芝峯和章附

旭日上東隅冠佩照通衢老子起出門披霜振
朝裾多病怯造請竊祿慙吹竽風慕草玄士乃

在城西居延我入靜室清言勝讀書宿露簷花
濕閑園春色餘况逢倚樓人初不費招呼鼎坐
拚一笑臨去重踟論及素訣令我味道腴
願言終日夕詩酒以相娛歸來委巷雨五字隨
雙魚欲報媿形穢燕石厠隋珠竹陰趙拾
是日亦來會

登韻謝竹陰過訪

生平慕大隱屏居城西衢善病罷朝請塵篋鏤簪
裾一春廢吟詩瘖如去簧筇筇有三十六簧或十九簧絕無好
事人來尋揚子居趙公文章伯腹有五車書南宮
自多暇珂馬興有餘肯訪席門人不待折簡呼春

泥滿委巷從騎為踟蹰詞林有芝老咀嚙紫琳腴
盍簪真盛事永夕聊共娛談屑隨塵尾書厨拂蠹
魚各思探驪龍誰當得玄珠

竹陰和章

附

美酒無曲巷大隱宜通衢留侯豈辟穀養病懶
曳裾文章叶五音恍如聆笙竽向來阻清眄一
尋踵君居撐箱蓄藥物連壁排圖書几席絕蒲
洒談論趣有餘酬酢捷無礙勢若順風呼對此
輒忘食日晏仍踟蹰芝老有緒言雋味飯腹腴
百年能幾何寸晷未盡娛幸蒙記勝篇筆力制

鯨魚將何報盛意媿乏明月珠

追韻答清陰

為君擊唾壺長歌行路難靈均空綴佩貢子錯彈
冠直道世所諱孤忠難自安命信一生奇名期晚
節完田廬足容膝春物且怡顏抱甕灌畦蔬投竿
釣溪魚六百官已滿一盂食有餘窮通泯憂樂
菑菌等延促各自崇明德終不忘忠告

清陰原韻在石室作

世路本平坦吾行自艱難思尋遠初賦未挂神
武冠乞暇歸田廬暫息非久安松楸喜無恙鄰

里幸保完知識聞我至爭來共歡顏
山翁餉新蔬溪友送鮮魚烹之或多之
一飽不願餘吾生此可樂何事以肩促
迷復亦庶幾從今矣不告
送朴大觀宰咸平

含慊不為苦食夢不為辛最是此別離
默默自傷神樞機歛不閑坦塗生荆榛
主恩本如天慘舒殊冬春升沉相糾纏
世事難具陳欲學阮嗣宗寸腸增輪囷
江南一千里漲海接天垠小縣無所為
飽飯吟白蘋

送俞子先宰伊川

深深白玉堂粲粲三珠樹一有鷓鴣栖群飛振毛
羽和鳴表聖瑞聲韻協韶護驚颺忽震薄蹭蹬向
何處遂失威鳳曹翻迷六鷁路恨不學爰居將身
落風雨猶復戀舊巢欲去重回顧感此獨爵結深
衷向誰訴

送羅夢賚宰江東

潘南崑玉姿烈火驗純剛祀溪朱絲弦促柱無緩
張羅生稍通偉慷慨懷剛腸三子在玉署直氣何
堂堂不謂遽如許片語成讐殃黃綬謫關塞有毋
不得將秋陰晦天字白日難回光贈子猛虎行邑

邑獨沾裳

送黃澗宰李德輿二首

清江古遺直胤胄皆克肖李侯屈儁才奉掾從常
調山縣大如斗一辭守蔭雞為安輿侍歡餘讀書窮
要妙

至樂在事親至要在讀書世間此事重為官乃其
餘地聯湖嶺界民多山洞居窮閭杼袖空一念在
响噓

奉和澤堂觀海畸菴三學士省志言志之作

二首

羸疾懶朝請，偃仰適閒情。索居少歡緒，左右眄稚
嬰。艱危念世事，百慮忽來并。亮乏濟時具，徒懷殉
國誠。珪組本非願，寵利恒若驚。玄冬督西侯，階闥
繁霜明。同人有佳什，逸韻填篋。虎鳴勗爾歲，寒意無
令負平生。

疊疊節序徂，飄風襲中堂。征鴻叫群侶，遐舉遠邊
霜。中國嘉樹實，時菊委殘香。感此獨歎息，鬱結縈
我腸。陰陽無停運，年貌隨頽光。盛滿已可懼，高明
匪所當。三復伐檀詩，默默中自傷。

十月震電令人憂懼，再用前韻記異。三三詞。

伯

玄天無聲臭誰能測其情二儀迭開闔邪沴或相
嬰恠此十月交乃有電雷并吾君勵宵正奉天
殫至誠仁愛煩譴告動威使震驚轟轟屋瓦振燁
燁恠攏明如聞鬼神過恐有蛟龍鳴灾祥不虛應
欲問劉更生

闐闐疾雷發中夜殷虛堂淫威挾狂電肅氣失凝
霜投壺豈玉文推轂疑阿香燮理是何人肉食宜
熱腸乾文以示譴浸沴侵三光天意不可詰咎徵
知誰當宵雅有遺音俯仰令人傷

賣癡鼓

街頭小兒叫有物與汝賣借問賣何物癡鼓苦不
差翁言儂欲買便可償汝債人生不願智智慧自
愁殺百慮散冲和多才費機械古來智囊人處世
苦迫隘膏火有光明煎熬以自敗烏黠有文章罔
羅終見罫有智不如無得癡彌可快買取汝癡鼓
輸却汝狡獪去明目不盲去聰耳不聵新年大言
利不用問著卦

次韻答朴大觀學士夢見鄭負外勸我讀書
覺來仍成古詩却寄之作

木生不願材恐被青黃文義頡洩天秘屬階自皇
墳樊遲差解事輟學慕耕耘仲尼却見譏五穀不
能分况此值衰季萬事莽紛紜識字憂患始何用
自辛勤吾儕嬰世網本自坐多聞却復勸讀書可
笑吏部君自嗜味衆厭事頗同食芹寄語潘南子
筆研真可焚無事且閑坐目送孤飛雲二餘君足
用小損猶起羣無為更呻吟矻矻窮晨曛官厨羨
醞在興到聊一醺北方多是非樂哉湖海濱潘南
還謝我爾意良懃懃人生各有志濃淡隨所忻那
能掩黃卷但解醉紅裙蠹魚白不惡芸葉有奇芬

明窓對萬軸忍負一鑪薰

權成吉內子挽

吾友永嘉子室中有賢婦
拊多新製衣篋留不盡
酒傷心偕老願不復到白首
莽蒼金陵阡江風吹
廣柳

送洪澤芳出守瑞山

洪侯初作郡顏色頗敷腴
我戲問洪侯作郡非良
圖伶院雖冗官判事中
大夫俸外有支給馬前多
騶徒有時到官舍盡日饒
歡娛法部奏咸韶教坊
羅娃姝高頭一按拍鍾鼓
雜笙竽聒耳却厭聽隱

几時捋鬚大兒尚貴主甲第臨通衢何論五侯鯖
內膳分天厨棋朋與酒伴日夕相招呼投轄共舉
白對枰爭呼盧不知作郡去還有此樂無文言積
几案出入眩墨朱折腰向督郵鹽眉貢逋租况當
料民日旁午煩追符須防略差跌不免暴肌膚酒
醪誰與共嘯咏誰與俱悠悠戀京闕悄悄對妻孥
懸知六載間贏得朱顏枯洪侯向我道子寧不知
吾男兒處世間適意自快媮市朝競利名著足成
畏途從來渡落人已自識頭顱不學東方朔混迹
群侏儒難追張本意爲發興思莖菰何妨兼吏隱滿

意遊江湖跌宕東平阮風流錢唐蘇公田既收秫
漁戶時供鱸歌呼和吏胥醉飽聊於子催科與撫
字隨事任踈迂意閑便投綬歸去田園蕪洪侯真
可人去矣莫踟躕笑殺老祭酒藿鹽度朝晡作詩
欲相送恐被鬼揶揄

送登極賀使韓知樞汝潯

皇明受天祿九有歸版章奕奕十六葉治功超漢
唐三韓箕子國八條何煌煌 聖祖樹藩屏命我
康獻王朝宗薦玉帛侯度靡愆忘往在龍蛇歲黑
齒肆跳梁八路被荼毒二京成戰場 先王在草

莽西面愬 神皇神皇赫一怒按劍開明堂發兵

十萬餘發帑百萬強徵調及楚蜀飛輓連青楊暴

師六七載掃寇完藩壇 一朝奠鍾虞兆民安耕

業 深恩實再造百代銘垂腸曆服忽三傳 今

皇撫萬方恭聞踐祚初不日恢皇綱北寺翦元兇

南衙登峻良石畫出巖廊榆關控金湯威靈所折

衝驕虜先勅勦太平萬萬歲歡聲騰八荒東藩奉

賀表使者方倣裝容路指溟濶風期縱餘艘天妃

護玉節蛟鱷潛遁藏轉眄拂蓬萊駉駉原隰長

皇居九天上萬國陳玄黃周旋佳氣中拜舞瞻耿

光男兒志四方履險如康莊此遊良已竒此別君
莫傷近傳袁山丞授鉞臨邊障何時滅匈奴遼塞
無豺狼中華正氣王惡氛自披攘送君芳草亭屬
君清酒觴贈君五字詩詩辭多慨慷萬里自此始
佇立空彷徨

題李子陵斜川帖次韻

陶潛古達者未老官早休無事偶乘興春日斜川
游子陵今世士頗與同風流身雖望簪組志欲親
沙鷁別業龍門麓風烟專一丘川名豈偶同異事
真罕儔居然傳藝苑逸韻相賡酬借問夸奪子此

意還知不種菊為掇英種秫為忘憂早晚歸去來
駕言何所求

畸翁以扶桑小研見餉詩以謝之

扶桑紫石研琢成小竹枝又作一鯉魚揚鬚戲漣
漪故人持贈我深情良自知竹以表歲寒魚以寄
相思晴窓試新筆聊寫五言詩

戲贈方仲素出按關東

尹侯出東界旱魃方為灾今剛失蒼翠鏡湖生塵
埃縱有路傍棠其如中谷蕪福星倘有靈散作甘
霖來

贈真一

妙香與智異皆白頭分南能與北秀同出釋迦
文頓漸無二教諍論何紛紛二師不應爾後學迷
所聞南雲如車蓋北雲如鑪薰兩雲合為一遂成
大法雲師乎會此否我意良慙慙叢林中方有語
論余欲打成
云云
片故為

和畸翁僑居值大風雨有賦見寄

疾風駭急雨咄咄真差事
中宵勢益顛合沓簸厚
地如聞神鬼彌恐有蛟龍
至尔愁牕紙裂翻驚屋
瓦墜衝壁倒書架掀床捲
布被空齋瑟縮久失氣

不敢睡六氣管化機披拂問誰使撫心欲成悸著
體乍如痺滎陽新落職僑寓轉顛顛盃觴病不親
筆研慵欲弃淒然風雨夕忽起江湖思齒髮已自
知行藏兩堪愧未成匹馬訪聊煩赫蹠寄何時會
江樓款款話幽致

和寄顯國弟

錦茵橫野起澄江抱郭斜南州地氣暖十月見草
芽我來知幾何星躔忽已差憑高時北望雪嶺重
重遮朝陽失鳳凰殺機起龍蛇鳳凰隱文章龍蛇
鬪角牙長安杳日下游子在天涯人生等萍梗世

故如塵沙流行與坎止浩然無怨嗟

送南澤之赴安岳

去年入送我錦城天南偏今年我送君陽岳海西
孺我去坐妄言君去知何緣行色兩不異地近君
差便君恩如造化添舒相推遷進退搃玉成直
道寧久捐陽岳自不惡九月翠磨天莫問東方事
看山時醉眠

送趙仁甫佐幕湖西

憶昔共處困隱約逾十年我乘海浦釣君種生陂
田過逢輒敷腴粟相留連不謂值聖際登朝

步武聯愧我最蒙 恩非才驟陞遷君雖稍屯道

妙譽超英躔臺閣主風議給舍窮清妍今子繼蜚

英橋梓映後先前年我被譴奉袂炎海壖諫疏咎

留我力盡未回天送我若有失別意難具宣我歸

入脩門 主恩一何偏僂俛強陳力日覺羸疾纏

今君又南去此行知何緣清時重直道道邊無如

絃豈應諫諍臣不為 明主憐升沉各有時內外

果誰賢定知湖幕裏涿水須紅蓮人生如流萍離

合摠偶然奈何二載間相送情綿綿世道日交喪

毀方爭為圓荃蕙化蕭艾鸞鷲避鴟鴞古來屈賈

黃樵悴沈湘邊送君意萬端贈君詩一篇此詩君
自看莫向世人傳

樂全公子因湯沐之暇將兼楓嶽之遊善哉
未嘗有也故為賦之

名山誰不遊俗客山所嗔問誰為俗客靈臺多垢
塵夫子有道氣雅尚無緇磷脫略綺紈習結託清
淨因况今訪仙區靈泉澡雪頻瑩然出清泚曝向
高秋旻身心兩無染芳潔得日新將此入楓嶽時
哉屬蕭晨山靈喜佳客雲物不嘖呻振衣毗盧頂
一覽窮八垠歸來正陽夜妙香發天真吾詩或有

助九淵感潛鱗

題殿中契軸

臺中何所有列柏何青蒼殿中何所作懷袖含風
霜清時締刺舉暇日接盃觴寄語圖中人古道莫
相忘

奉和清陰書懷之作

人生幾葛裘俛仰成白頭形役苦未已遇閒聊自
偷鉤絃異曲直齒舌分剛柔豈不擇所便寸心翻
自羞簪紳解縛人欲脫知無由聊從方丈室暫託
汗漫游

送朴德雨出宰靈光

羊羶有何好，閻蟻死不休。君看飲露蟬，亦為口腹謀。六鷦自退飛，衝風非爾尤。昂昂天馬駒，不受金絡頭。物性各有適，未可論劣優。行矣墨綬客，得意復何求。

關西方伯閔公士尚傳示金伴使得之題劔

山詩屬和甚勤次韵却寄

光山五字詩傳自關西營開緘為動魄森若戈鉞橫詩中意激烈直欲掃撓槍往事豈堪說邊將久忘兵虜馬卯年來舊識還可驚壯士恬國耻未見

一箇英金繒且餌虜遵養待徂征廟謨過周慎不
翅先後庚薩北置度外亦非敵所爭誰能捍大難
與國作長城堂堂汶上公一柱天可擎殉國已忘
身好謀能有成旌節受專閫草木早知名瞻彼劔
山城絕險依崢嶸釣魚控全蜀勝筭收舟生天壁
聳雲際鳥道纔通行版築成不日萬杵殷雷鳴負
竭孰搜虎築觀擬誅鯨豈唯壇場靖將期氛祲清
刁斗響嗷嘈劔戟擯青熒士選勇氣厲將良籌畫
明宿飽足儲侍重門嚴閑闕小效見前歲大豐終
自平金公詞林秀文彩兼華精擁傳一登臨默歎

方略宏作詩記目擊郵筒傳漢京上言禦羯奴下
言活遺氓因及老夫辭舊作亦見評屬和良已勤
載名翻自榮為我謝方伯後實逾先聲人和重地
利子弟衛父兄

弘慶寺碑和畸翁韻

平川帶官道莽蒼數十里道徇前朝寺坡陀留故
址風烟黯慘淡原隰紛迤邐泉枯井已堙石倒塔
亦記唯有古碑在突兀荒草裏龜龍未剥落字畫
猶可視傑構翔麗光鴻文出學士去今知幾何已
過五百襍詞采頗巨麗筆蹟龍蛇起貞珉產何地

瑩滑無玷滓當共建立日豈道今如此禪宮既銷
歇甕鼎亦顛趾因知泡幻理益證空門旨文章差
可恃獨不隨逝水摩挲不忍去佇立送殘晷願言
廣墨本傳玩無窮已

和韻寄呈畸翁直廬兼示菴庵子

畸翁坐騎者懶慢不記馬菴老老益窮酷似孟東
野二子晚相遇用詩自陶寫寒宵強拈筆醉眼眩
膏火而我病不出謝客成癡卧殘書倦遮眼隨意
作禪坐空簷瞑靄合靜聽風葉下老境歡意少清
樽共誰瀉待君下直日相邀醉良夜

又和懷石洲

落落石洲公乘黃絕凡馬居然隘人寰獨遊壙浪
野平生千首詩已入殺青寫猶堪映騷壇恨未充
藻火高人遭亂代難得學龍卧坡陀園土血竟以
詩案坐念非得御初見賞一言下悲涼八哀篇有
淚不禁瀉豈獨山巨源長懷嵇叔夜

和李祭酒子時重植次元柏之作

柞栝在山藪樵斧所不置嘉樹荷封殖託根幸得
地物生繫遭逢寵辱皆外至肅肅芹藻宮僦僦瑚
璣器廣庭列嘉植森然擁峯翠西偏狀元柏獨也

出羣萃多士角觜距文場。拔幟佳名衆所慕。撰
陰成好事措大重。取雋鼓舞無愚智。他時卿相選
往往由此致。歲久物則換。舊號終不棄。今古閱裁
培。幾人同此意。斯文金與李。大魁標秀異。咄嗟顧
眄地。居然見榮悴。况此歲寒姿。堪為心賞寄。人材
樂成就。文物戒廢墜。移來兩石間。離立三尺緝。但
使本相固。日看柯葉遂。物微意實深。生艱成或易。
昂霄會有期望。望望勤行企。直須倩良工。丹青描髣髴。
新詩傳藝苑。逸韻共鼓吹。屬和及病夫。呻吟發
滯思。仍思昔年事。壁雍同長貳。竊愧角觜賦。聊欣

斷金利

示慧珠上人

山人一顆珠問從何處得本非蚌胎生誰言龍領
摘從來繫衣底半生不自覺一朝拈出來隨方映
五色君若欲得時如來藏裏覓

七夕有懷樂全都尉兼寄汾兩

昨逢山中人看君卷裏詩森如對顏色慰此長相
思獨恨牛女夕仍作夢商離汾公景契闊令我抱
調飢商飈墮井梧已覺徂年悲孤吟寄情素不敢
問佳期

樂全和章附

病慵百不為舊業廢書詩偶因山僧歸漫吟寄
所思咫尺不相見何異千里離忽此枉清章足
以忘渴飢仍憶昔年遊頗覺曠途悲逝序苦不
佳感茲牛女期

汾西和章附

斯世既棄我而我亦棄詩最是未能忘城西有
所思陸武苦難出作此長相離萬事本范多夢
飽較真飢何須將睽密湯爾生喜悲為君且強
起來日以爲期

仲連和章附

昨見高篇抵家兄所結習未忘強欲拚
和不敢自外謹附闕中一笑

搦我三寸管和公五言詩經時各抱疾咫尺徒
夢思方藥都拋却形容已交離田園苦無地文
字不救飢并梧一夕凋秋氣生新悲良宵月向
圓留與羨人期

用前韻謝樂全汾西仲文三君子來訪

會友當以文言志當以詩知音有三益貴然同來
思却歎穹壤內歎合常多離評詩乍解願闢棋仍

忘飢相看各老大撫迹翻傷悲蕭辰可乘興珍重
望前期

樂全和章附

昨日成佳晤今朝得新詩晤對既露肝詩吟非
締思靜觀物之理有合斯有離蚩蚩却昧茲夢
中論飽飢所以貴知微不欲形愉悲宇宙百年
內幾人同襟期

閉戶足清致傳筒多好詩雖與今人居却結古
人思時時振綺藻五彩何陸離欲辟子房穀不
比方朔飢耽寂遺四大守玄了喜悲勗子且強

起際此休明期

樂全和成二首復此申謝

停雲久在望草蟲俄賦詩俗物解敗意義人真可
思相逢兩敷腴野服欹接離却慚中饋薄疏擣聊
充飢良時抱沉疴瘦骨堪自悲唯應玄晏子不減
榮啓期

汾西和章附

忘憂豈賴酒煎腸無過詩逝將擣詩酒寂默入
不思既超生與死安論會兼離有身固大患無
涯從我飢命薄不須恨途窮何足悲見子如不

見冥心惟所期

神速和章

四載一會面三日再見詩造語出天真渙然若
不思掛之高堂上照壁光陸離平生嗜文章如
渴復如飢從公願努力庶免老大悲倘許不遐
棄今世遇子期

又用前韻寄天章

又覺口生臭不讀李生詩中心積湮鬱夜夢因晝
思昨感牛女會為賦生別離三友幸聯鑣慰我長
如飢座上不見君歡劇仍生悲君如同此意請問

汾淮期

白洲和查附

冗瀉苦相迫止酒仍廢詩佳辰阻良晤鬱結勞
我思天上有會合人生多別離清篇荷遙示愛
玩忘午飢秋炎亦無樂宋玉易生悲過從趁新
月不負城西期

青山送暝色雨脚映新詩詩成謝故人日夕費
夢思咫尺不相見不須傷遠離田家白麥飯亦
足充我飢役役為誰故偏側令心悲願言携手
歸白首以為期

白洲舟和復疊寄謝

我抱公幹病懶作漳濱詩
端居守鼎爐萬緣都不
思平生金石交咫尺成睽離
籠中海鶴瘦樞上天
馬飢牽帥偶拈筆寄興
乃娛悲知音幸可託許爾
是鐘期

又和樂全閱陶詩有感之作

淵明有道者餘事還能詩
惜惜韶護韻杳杳羲皇
思斯人已千載正聲日以離
大羹孰知味腥腐填
饒飢志士仰高風攀和有餘悲
知君繼家學雅詠

發心期

樂全先相公有和陶詩在集中故結句云

送李侍郎基祚出按嶺南二首

度支十五月米鹽苦埋頭腐客索金幣渴叫生塵
喉喜君獨抽身按節行清秋快若馬脫銜翩若鷹
辭鞞休言到部日堆案如山丘唯應霹靂手揮霍
無停留威風挾惠化千里爭歌謳時時念故人
翰遙相授

城南舊卜鄰比舍多名卿亦有二三子卯角才且
英北洪與南李吾弟亦齊名真如同隊魚日夕相
隨行居然二紀來各已騰賢聲洪李繼持節吾弟
鎮西京後生誠可畏老大翻自驚送君感疇昔萬

端集中情

用清陰韻贈別商嶺金使君尚安三首

勤民在祛癘虞帝咨州牧漢家二千石實維親民
職金侯政無儔往歲領大丘不知操何術自看威
惠流陞遷綺皓鄉千騎出東方腰間綬若若籍甚
賢聲揚雄州號繁開豪俗存猶稍行當正提封情
為難覆按游刃破餘地在君能事耳清秋整熊轡
別路臨漢水親懿曠莫從嚴程苦倥偬過嶺聞離
鴻懸知歸思動

我如張仲蔚蓬蒿深掩扉何來五馬客門巷歟生

輝自言將遠適來日是別期念昔託姻好誓言相
追隨卧病斷人事故意終莫違相逢輒懽然坐語
至斜暉歲晚忽分手西風吹客衣脩路間嶺嶠夢
魂難因依丁寧別時語政成早來歸

人生一世來穴蟻託庭槐紛然聚復散何樂亦何
哀俗物每敗意好懷無與開有唱孰能酬知音難
可求世故紛萬種觸緒皆可恐今君又告別令我
勞愁夢秋陰結遠岑江漢秋潭潭臨歧欲何贈頭
白短長吟

送閔侍郎上尚按節嶺北

巖巖鐵山領關元元長白山澶漫七千里表裏山海
間是為國北門形勝雄三韓觀風任已重節制兼
登壇閔侯雖短小曾有萬甲蟠少年擁節旄馳
濟時艱至今三路民口碑騰媪鰥罷官歸洛城僦
屋多辛酸省署席未煖復此跨征鞍人為閔侯恨
獨賢良可歎閔侯笑且言險夷吾能安但憂王
事難此邦實凋殘邊氓盡逋亡亭障唯榛菅不聞
防秋士瓜時問刀環不聞輸粟令紅腐車班班但
見削脂膏不見補瘡癥况彼獯鬻氏獸心婪且頑
吞噬意無厭舊盟何足寒縱有折衝志奈此智力

殫吾聞古人語萬事繫寸丹操刀自能割豈愁盤
錯難方當中興際經緯良可觀藩屏有嘉謨采納
何曾慳行看鎖鑰壯威聲龍言臯蘭功成蚤來歸玉
佩鳴朝端

澤之左遷陽山也僕有詩送別居五歲而超
陞建節仍按本道 恩擢異常知舊相慶遂
用前韻以贐其行

循良民望重寵擢 主恩偏雙旌領方面五稔滯
海壖潁川著異政桐鄉疑六緣操刀遇盤錯妙手
真得便功名貴及時衮衮看超遷構厦籍群材獲

楠寧或捐驥足騁長途
鵬翮摩蒼天不似陽山別
羈愁付醉眠

哭吳肅羽

豫章欲昂霄摧折充勞薪
天球薦東序碎作擯中
塵斯人遽如許使我空傷神
豈獨為吾私所悲失

國珎

才難古所歎殄瘁詩人悲
鬪葦多壽考秀士翻早
萎傷哉邁往姿一病而止斯
天高鬼神惡咄喑當
告誰

星輶赴關河再拜辭
萱闈不見綵衣來
但見丹旌

歸哀哀寡婦賦慘慘孤兒詞人生孰悉此行路亦

沾衣

我抱漳水疾君持海西節君歸我猶病又作關山
別關山別幾何生死遂長訣不見別時雲寒颯助
淒切

問造物

甲戌冬大病中作

請問造物兒一何相挽為我有四大身危脆如懸
絲委諸二豎子毒手操鉗鎚寒熱鑠臆水火銷
骨肌不知此神尻輪馬終何施我生本嬾拙但解
雕篆辭只圖自娛樂非敢私天機未省何負犯忍

此相侵欺從今痛懺悔稽首毗耶師願言少寬我
康茂延天期

造物答

為答谿谷子胡為妄見誣我於物無心萬化自紛
敷榮萎與脆韌物性各自殊我本一視之疇疾疇
响濡子兮稟單羸中虛而外懼不學衛生經多能
自毒痛譬彼膏火明相煎終自枯既窮不知返妄
語何其愚但令去蝨賊自見嘉谷蘇冲恬味真腴
眉壽保康娛

送崔子迪侍郎泛海朝天

以下續稿

玉京時層霄滄溟環八埏迢迢不可上淼淼誰能
沿獨恠槎上客浮海仍朝天雲颿破巨浪霞佩參
羣仙月旋佳氣裏拜舞爐香前人如吳季子跡似
漢張騫游仙真一夢種福應前緣好將天上事歸
與世人傳

秋日卧病用太白紫極宮韻

庭前數畝地種菊不種竹不恨無秋聲寒香坐可
掬自我抱沉疴三載處塊獨有時憶舊游夢作禪
房宿流年手中著萬事已可卜昔賢貴知非吾生
愧迷復塵止鑑易昏水滿器即覆誤却此生計從

今思爛熟

題希窻玄公詩稿三十韻

昔交徐秀夫始聞玄公名聞名未識而自歎虛此生
生蒿里寄哀挽愴然空沾纓節孝與玄晏擬倫良
不輕徐生輯遺稿就我要批評長短古今詩二卷
猶未盈盥手一披讀聲韻何琮琤碧瀨少淵泓清
激心神醒瓊樹羨柯條不願充筵楹野逸林魏儔
刻厲郊島并陸覺牙頰爽越茗滌葷腥亦復喜使
事搜剔窮窻冥縱非陶荷產臚列頗縱橫獨恠清
澹姿未謝丹白情若語不忍讀一字一涕零艷語

一何羸夢魂留餘馨才子或多情何嘗累堅貞閑
情出國風未可疵淵明生平嗜麴蘖五斗堪解醒
苦乏種秫資無以滿瓶甕津津語不厭風調令人
頌皇天賦萬品予奪多不平有才苦無命借問誰
使令才名四十年窮獨依林垞百事不如意貧病
相纏嬰畢竟奪童烏誰復傳玄經文章獨不朽百
代存典刑秋懷和余作壓卷最精英莊惠激稚辯
郢匠相待成神交付冥冥持此慰潛靈

大凡

南風吹沚立勢壓千林木千林枝幹壯排幹有餘

力獨憐平疇二宅荒黍與稷黃流卷將去但見沙
水白旱苗猶可蘇水沒無蹤迹極備均為蓄陽元
賢陰慝

苦雨

三月旱猶可三日雨難堪况復更彌旬綠蘚生辟
龕前宵挾雷風勢欲掀茅庵朝來視天宇雲物怒
猶含或傳行雨龍近虛鷺江潭陰機入簾弄潑水
恣驕婪謠言亦可惡浸溜半終南便欲箋天公真
宰意難諳忽思征役子泥塗困負擔西窓露頂卧
優逸翻懷慙

索居放言十首

大虫食小虫彊者飽弱肉吞啖世界內物物相殘
賊彊者豈常彊有時遇勅敵任力力無盡任智智
相百至人斷人我心與虛空廓虛空不勝物物亦
勝不得

人為膚寸舌百味窮鮮腴不知纔過咽便與糞穢
俱目欲極艷色花顏丹白粧尋思此何物臭血盛
革囊味色是同欲究竟皆大惑勘破此公案超然
無所着

榮官世所慕外至非天得於中無增損於外有美

惡士方被褐時親戚不省錄一朝乘高軒路人為
匍匐寵辱本無常世情隨地易真貴自有在可憐
人不識

翟公恨舊客書門以告絕田文感馮生待士終無
失炎涼異趨捨古今同一規褊心或豢帶智士能
自知褊亦有所累智亦有所為蚊蠅聚復散何足
關心事

蜘蛛大徑寸吐絲細於髮緣絲走空裏往來終不
絕無乃此微虫學得步虛術物性有固然天機亦
可奪飛龍無羽翼雲霧無形質奈何世俗人不信

神仙訣

蛆虫生溷中到死不曾離
豈知天壤內更有清淨地
人生處世間與此無甚異
囂焚利名窟臭腐鮑魚肆
汨沒無出期冥迷心骨醉
副宗禪虱喻異指還同致

長夏困蚤蟲夜寢為屢興
何緣痛掃除去我心所憎
忽思古釋子將身施蚊蚋
形骸既假合痛癢何所係
斯人非我徒斯理未可非
翻慙有形累一咲聊成詩

狸奴善搏鼠偷肉屢不治
一夕攫鷄雛母鷄鳴聲

悲一攫猶自可再攫鷄且盡去鼠誠有功鷄盡又
何忍呼僮弃野外不殺猶存厚恃功多不終韓彭
亦自取

堯時九年水萬國愁魚鼈先朝乙巳災東海為飛
翻今茲雨無極彌月猶傾盆高田已沉淪下田何
足云豈聞郿邑內奔湍壞屋垣安得倚天劍一抉
陰雲也

芭蕉葉重重盡從中心出初卷旋自展展盡卷復
茁一脊布羣肋條理何微密誰能刻雕此巧妙不
容說花卉非為目物理可玩閱三斗作楮葉辛苦

笑爾拙

詠木假山并引

舍弟留守得一木假山真狀自然不假刻
畫浙人朱葵卿記之甚詳余為賦焉極陳
其竒恠而終折之以至理蓋以風其好竒
之癖云

木生深山中蟠根絡嵒石千霜與百霽老大歲月
積匠斧取其幹獨留根盤礴山靈特好事持弄供
戲劇幻出山岳形物像非一族何煩運剜削巧勝
倖班斲唯有蟄龍知世人那得識洪流一夕叢山

谷互翻覆漂查隨怒濤勢欲輸海若異物自有主
江神為護惜吾季眼孔開早學張華博舟行忽遇
之似有紫氣羃攬置沙沚上輸將一牛力清流刷
滌盡旋付秋陽曝森然真骨露諦視吁可愕雙峯
屹並峙其一是雄伯次者勢稍卑遜挹不敢角參
差列崗巒窈窕分洞壑躡者類虎豹伏者似麋鹿
牙角乍可分儼若相拏攫詭恠千萬狀盡筆描不
得吾季性好竒得此大愜適薦以小石床不離几
案側吾觀造化妙觸目儘竒特山川自流峙蟲獸
各形色細思真大巧問是誰雕飾木石或肖似幻

相非真的真者滿天地幻者偶一獲真者厭其常
幻者喜其獨真幻取舍間世情同一惑安得金篋
手為君刮眼膜洞然觀照方不為諸幻隔仍將此
朽槎付與壯士擲悠然對南山爽氣長在目

申文功甫在謫日嘗以蘇長公賦中是身如
雲我何居之語舉似清陰索一轉語清陰以
詩答之功甫以示余因覓和章牽帥賦此

是身如浮雲何可問行止百年真一瞬四海猶同
里隨緣絕罣碍無遠亦無邇蘇子賦中語大意思
應爾區區一字義辨析安用此寸心辨主宰萬化

受驅使三教本一致用之無不利申公六十化久
已悟此理空言增口業媿殺谿谷子

申公自号此
堂盖用蘧伯

語

清陰原韻附

太空無端倪浮雲無定止隨風恣飛揚一息千
萬里不自任去留何能分遠邇出出本無心歸
山亦偶爾人生寄宇內無以異列止東西與南
北莫非天所使奈何世上人營營擇便利相將
智力求可笑不達理坡翁示妙訣請證平山子

和東陽都尉夜夢畸翁覺未怡悵之作

古人不可見古道日以漓賴有二三子結交童稚
時中年閱萬變益覺臭味宜畸翁落湖海不改舊
三癡往者客長安但問深淺庖忽去不肯留夢想
空餘悲人生是離合歡緒坐差池因君動苦吟離
思杳天涯

畸翁舊號三癡
僕嘗著說

秋日有懷畸菴子

重陽亦已過節序一何促晨霜下庭蕉敗葉委繁
綠恨不種時菊心賞寄晚馥良友在天末一別無
消息昨見淮翁詩夢裡接清覲情深語自別凄切
不堪讀叔世友道缺古人歎翻覆知音耿難忘作

詩繼伐木

銘谷先生集卷之二十五





卷之五

十一